

VINDICIÆ CONCILII LATERANENSIS MAGNI,

A contumelijs & imposturis IOANNIS
COSENI, Angli, Theologiæ Doctõris,
Protestantium Parisijs degentium
Ministri.

Authore THOMA VANE, Anglo,
Theologiæ Doctore.

2. Tim. 3. 13.

*Mali autem homines, & seductores proficiunt
in peius, errantes, & in errorem mittentes.*



PARISIIS,
Apud ÆGIDIUM BLAIZOT, propè
portam sancti Marcelli.

M. D C. L.

1 Cam Permissione & Approbatione.

VINDICIA CONTRA REVERENDI

JOHANNIS

1601

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS

JOHANNIS



EMINENTISSIMO

AC REVERENDISSIMO

D. D.

CARDINALI

R O M A.

QUOD vinea Dei avita,
Ecclesia scilicet Judaica
(Eminentissime ac Re-
verendissime Domine) olim acci-
dit, ut ingruente diaboli malitia,
vulpes & apri, ceteraque fera, im-
pī nimirum & heretici eam pau-
latim devastauerint; de quibus

A ij

Rex David verbis hisce & simili-
bus agerrimè queritatur; Exter-
minauit eam aper de silua, & sin-
gularit ferus depastus est eam;
id omnium temporum decursu,
Ecclesia nostra Christiana conti-
gisse, & experimur & querimur.
Exemplo esto impraesentiarum Co-
senus hic, qui peruertendis Catho-
licis, studium quotidie suum na-
uare non desistit: & sicut Scribe &
Pharisei à Salvatore culpati,
Claudit regnum cælorum ante
homines, ipse non intrat, nec in-
troeuntes finit intrare: atque hoc,
non verbis solis sed scriptis; verbis
tamen & scriptis malè compositis;
quæ superbiam sapiunt non graui-
tatem, vanitatem non veritatem:
quibus tamen ignorantes & in-

Epistola.

constantes eludit, & mendaciorum suorum trophæa, sibi, & eorum patri diabolo erigit. Has feras captas vult Deus, dicens, Capite mihi vulpes paruulas quæ demoliuntur vineas: Capere autem est vel conuertere, vel refutare; hic verò conuerti cùm recusauit, residuum est vt refutetur. Et quanquam operis huius molem, quantitate licèt perpusillam, ingenij mei tenuitas commodè sustinere nequeat, non rebus modò arduis sed minimis quidem impar; tamen cum libellus hic suus sermone anglicano exaratus fuerit, ab officij mei ratione, qui Anglicus sum, (dum alij digniores hominibus piscandis suam nauant operam) atrocem hanc feram ve-

Epistola.

nari, non alienum esse duxi. Quæ non una est bestia, sed multiformis chimera, quæ omnes omnium ferarum qualitates pravas complectitur. Atque hanc, qualis qualis sit, veritatis laqueis ei iniectis, in vinea nostra deprehendi.

Nec cuiquam satiùs aut concinnius opusculum hoc offerre me posse existimaui, quàm Eminentiæ suæ; tam Suæ ratione, quam mei. Suæ quidem, utpote quæ fidei Catholicæ propaganda propugnandaque, necnon morum castigatorum, in hac aetate declivi, instaurandorum, summo desiderio flagrat. Cuius etiam dignitas, ut Ecclesiæ Pater & Princeps, protectionem rerum Ecclesiasticarum, contra eius hostes infestissimos,

Epistola.

optimo iure vendicat : & cuius
nomen ipsum, Concilij Romæ ha-
bitipatrocinio, affabrè concinna-
tur. Mei verò ratione, quippe qui
Eminentiaæ suæ omnibus nomi-
nibus deuinctus sum, quæ me
summa cum humanitate chari-
tateque Romæ recepit, ac dimisit;
& adhuc singulari sua beneuo-
lencia me meosque prosequitur.

Nec mihi magno vitio verten-
dum esse spero, quod libellum adeo
exiguum Eminentiaæ suæ obtuli,
cùm Deus ipse dona nostra nulla
ob exiguitatem respuit, si saltem
facultatibus, & rei nata propor-
tionem seruent. Et quoniam aut
in ingratitudinis vitium mihi
rolabendum esset, nihil offeren-
do; aut audaciæ, nimis exiguum;

Epistola.

*hoc quàm illud eligendum potiùs
esse existimaui ; utpote quod ci-
tiùs, quia minus malum, veniam
obtinebit. Quod totum illud est,
quod hac in re expetitur ab.*

Eminentix suæ

Humillimo, deuinctissimo,
addictissimoque cliente

THO. VANE



LIBELLVS

C O S E N I.

DE CONCILIO GENERALI

*Lateranensi Magno, sub Innocentio
tertio celebrato, Ann. Dom. 1215.
quod Maximum & Celeberrimum
nuncupatur.*



MAXIMUM quidem, eò
quòd numerus octingen-
torum Abbatum ac Prio-
rum (qui nullis in Conci-
liis gaudebant suffragiis, nisi ex specia-
li Papæ priuilegio) duplo maior esset
numero Episcoporum.

Celiberrimum verò, quòd vbique ter-
rarum celebre fuerit ob hoc vnum, val-
dè notatu dignum, tot nempe viros
inani studio conuenisse; conuenisse
quidem, at nihil egisse.

De hoc itaque tam magno tamque celebri Concilio, ita profatur Platina, (qui ipsi summo Pontifici fuit ab epistolis) in vita Innocentij tertij. *Venerunt multa tum quidem in consultationem, nec decerni tamen quicquam aperte potuit, quod & Pisani & Genuenses maritimo, & Cisalpini terrestri bello inter se certarent: eò itaque proficiscens tollenda discordia causa Pontifex, Perusij moritur.*

In idem recidunt verba Mathæi Parisiensis (qui, eadem quâ conuocatum est hoc Concilium tempestate, floruit) in *Historia sua minori*. *Concilium illud Generale, quod more papali, grandia primâ fronte præ se tulit, in risum & scottima desijt; quo Archiepiscopos, Episcopos, Abbates, Decanos, Archidiaconos, omnesque ad id Concilium accedentes, ludificatus est. (Post discessum quippe Pontificis, ad sedandos tumultus inter Genuenses Pisanosque exortos, nihil actum est.) Et cum nihil geri in tanto negotio cernerent, redeundi ad se cupidi, veniam sigillatim petierunt. Quibus Papa non concessit, antequam sibi grandem pecuniam promississent; quam à mercatoribus romanis accipere mutuo, Papaque soluere*

coacti sunt, antequam discedere Roma potuissent. Papa iam, accepta pecunia, questuosum Concilium dissoluit gratis, totusque Clerus abiit tristis.

• Multa insuper sunt, quæ nobis prætenti huius Magni Concilij auctoritatem, meritò suspectam reddant.

1. Nam primò, priusquam illud Cochlæus in lucem edidit, nusquam extabat; nec ita tamen pridem ab eo editum fuit; anno nimirum 1538. Tribus duntaxat retro annis, cum Merlinus suam Conciliorum collectionem in lucem edidit, nullum tale Concilium illi occurrit, vnde nec in illius editione continetur. At Cochlæus (vir non adeo probatæ fidei, quique multa in scribendo Lutheri vitam finxisse deprehenditur) asserit, se huius Concilij decreta ex peruetusto codice deprompsisse; sed vndenam hunc codicem acquisiuerit, quisve illius author, aut cuius tandem ponderis fuerit, ne gry quidem. Verisimile est, non alium fuisse hunc peruetustum codicem, quàm volumen Decretalium, in quo sparsim hic illic continentur, ea quæ ab ipso in hoc Concilio statuta esse perhibentur.

Hæc fragmenta credo Cochlaeum, aut alium quempiam in vnum collegisse, & in formam Concilijque modum compaginasse. Forma tamen ita rudi & impolita, vt multoties ipsum se probat genuinum non esse, nec ex aliquo probato exemplari desumptum.

2. Qnis etenim sibi animum inducere poterit vt credat, fieri posse, vt Concilium hoc Lateranense, decretis canonibusque ibi sancitis, Concilium Lateranense citaret? id est, seipsum citaret, non tanquam Concilium tunc temporis sedens, sed multis retro annis (aut saltem aliquot) habitum? Aliorum quidem Conciliorum huiusmodi solet esse loquendi formula; *Hæc Sanctæ Synodus decernit*; siue, *Placuit huic Sanctæ Synodo*; quæ verba sessionem sonant, iam tunc cùm statuta feruntur, superstitem. At Concilium hoc Lateranense de seipso loquitur tanquam de alio quopiam Lateranensi Concilio, ab eo quod tunc celebratum fuit longe diuerso; vnde vocibus utitur, *Fuit, & noscitur fuisse*, tanquam de decretis antea latis; idque variis in locis, non minus quàm sexies; semel

cap. 11. bis cap. 29. ter capitibus 33. 46. 61. *In Lateranensi Concilio pia fuit institutione pronisum. De multa providentia fuit in Lateranensi Concilio prohibitum. Denoluatur collatio secundum statutum Lateranensis Concilij. Et in Lateranensi Concilio noscitur fuisse prohibitum. Equis hæc verba ipsius Concilij Lateranensis esse crediderit?*

3. Huic igitur turpitudini, quasi fucō quodam, mederi nititur Cochlæus, hac coniectura, (in præmio huius Concilij à Crabo edito) fuisse nempe hæc decreta in vnum collecta, inque ordinem quo ab illo exhibentur redacta, per ipsummet Innocentium Papam, aliquo post absolutum Concilium temporis interuallo. In quem finem, tria capitula dicti Concilij citat, (de eorum numero quorum superius mentionem fecimus) additque, lectorem facili negotio idem deprehensurum. At quisnam prudens lector æquo animo feret, Concilij decreta aliquo temporis curriculo post eius dissolutionem conscribi? Moris semper erat Conciliis, sua quæque decreta scriptis mandare, nec finem prius imponi fas

erat, quam illis etiam esset subscriptū. Sed neque Innocentius Papa rerum agendarum aded imperitus erat, ut ipsam Synodum Lateranensem in hunc modum loquentem introduceret; *In Lateranensi Concilio noscitur fuisse prohibitum: vel, Fiat hoc, secundum quod prouisum est in Lateranensi Concilio, &c.* Quod genus orationis multum abhorret à vulgari stylo viaque loquendi, quoties alicui Synodo de seipsa sermo habetur. Neque hoc Innocentium tertium vlllo modo latere potuit.

4. Consultissimum itaque erit, Platinæ verbis acquiescere: *Non est decretum ibi quicquam: non potuit ibi decerni quicquam. Improbauit Innocentius ipse Abbatem Ioachim libellum, damnauit ipse Almericum.* Dicit non fuisse Concilium Lateranense quod ad eos condemnandos decreta tulit, sed Innocentium ipsum fuisse qui eos condemnauit. Et appositè concludere possumus, cum hæc tum alia, de quibus nihil decerni potuit in Concilio, ab ipso Papa in suis Decretalibus descripta fuisse, unde hos canones decerpfit, quisquis ille fuit qui primus eos in Concilij formam redegit.

5. Tertius etenim huius Concilij canon (de excommunicatione Principum secularium, deque potestate papali eorum subditos à vinculo fidelitatis absoluedi, eosq; regnis & principatibus spoliandi) de numero Extrauagantium est, cap. 13. de Hæreticis, id est, Ipsius Innocentij Decretum, non verò Concilij Lateranensis, *vbi nihil decerni potuit.*

6. Sic Canone 71. (qui est de recuperanda de Saracenorum manibus terra sancta, qua de re Concilium hoc imprimis conuocatū fuit,) collector stylo vtitur Pontificibus, non Concilijs vsitato. *Ad liberandam (inquit) terram sanctam de manibus impiorum, sacro Concilio approbante definimus, &c.* Neque simile quicquam in Concilio definitum fuit; vt cum Cardinalis Bellarminus (aduersus Apolog. Regis Iacobi) cum Eudæmon Cidonius (in sua parall. Torti & Tortur.) Platinam secuti, fatentur.

7. Quisquis igitur ille fuit qui hæc duodecreta, de subditis à vinculo fidelitatis absoluedis, deq; recuperanda è Saracenorum manibus terra sancta sanciuir, idem etiam iure censendus est

author istius Canonis, *de transubstantiatione*, qui tot in orbe tragœdias excitauit, & ob quem, Concilium hoc toties *Maximum omnium, Generale, & Celeberrimum* proclamatur.

8. Verum enimuerò, quicumque primus Conciliū hoc Generale siue composuit, siue illud postmodum in lucem edendum curauit, eumque Generalis Concilij titulo insigniuit, haud certè partes suas vsquequaque calluisse videtur. Fieri enim nullatenus mehercle potest, vt inter septimum & octauum Generale Conciliū, aliud Concilium Generale intrudatur, præcipuè si magnum aded ac generale fuerit, vt asseritur; quod tamen huic Concilio accidere necessum est. Nam secundum Nicenum, septimum Generale numeratur, quod anno 787. celebratū fuit. Octauum verò locum sibi vendicat Florentinum an. 1449. habitum; vti clarè liquet ex his verbis, sessione eius vltimæ subinfertis: *Finis octauæ Concilij Generalis factus est 21. Iulij, &c.* Aded vt nisi duo Concilia Generalia octaua constituerint, hoc nullum esse posse patebit.

9. Præterea, si vniuersale fuit hoc Concilium, vnde factum est, vt illius canones nunquam fuerint vniuersaliter recepti? quemadmodum apud nos, in Ecclesia Regnóque Anglicano, nunquam fuisse constat: quod secus procul dubio accidisset, si tunc temporis, Concilium illud, Vniuersalis Concilij famam obtinuisset, aut illius canones, sub eo nomine, per terrarum orbem diuulgati fuissent. At apud nos in Anglia, ab eo ipso tempore, & contra eius canonem prætentum 46. mos inualuit, vt subsidia Regi soluerentur, *inconsulto Pontifice*. Et aduersus canonem 41. nobiscum *currit prescriptio*, quantumuis multoties *ex bona fide ortum non habeat*. Iterumque, *Clericorum bona qui de hæresi conuicti sunt, non in usum Ecclesie*, sed fisco Regis constantissimè addicta sunt, quidquid in appositum faciat prætenti Concilij canon tertius.

10. Denique vix crediderim, probatam vllam historiam, ad astruendum huius prætenti Concilij titulum, proferri posse, Patriarchas Hierosolymitanum & Constantinopolitanum, &

septuaginta insuper Metropolitanos ei interfuisse : quanquam neque illud fat erit, ad Vniuersalis Concilij nomen ac dignitatem huic conciliandum, ob absentiam nimirum reliquorum Patriarcharum, Antiocheni & Alexandrini, quos interfuisse non fertur.

Ut ut se res habet, *Nihil ibi actum, quod quidem constet*; aded ut non modò non vniuersale, sed ne Concilium quidem omnino fuit.

En (Lector amice) totum Coseni discursum, inconscisso orationis filo tibi exhibitum, quem ad memoriæ leuamen, eorumque quæ dicenda sunt expressiorem intelligentiam, in tot ferè sectiones partiemur, quot ab ipso prænotati sunt illius articuli, quibus singulis suam seorsum responsionem subiiciemus.



VINDICIÆ

CONCILII

LATERANENSIS

MAGNI.

COSENVS.



MAXIMUM quidem, eò quòd numerus octingen-
torum Abbatum ac Prio-
rum (qui nullis in Conci-
liis gaudebant suffragiis, nisi ex spe-
ciali Papæ priuilegio) duplo maior
esset numero Episcoporum.

Celeberrimum verò, quòd ubique
terrarum celebre fuerit, ob hoc vnum
valdè notatu dignum, tot nempe vi-
ros inani studio conuenisse: conue-
nisse quidem, at nihil egisse.

De hoc itaque tam magno tamque
celebri Concilio, ita profatur Platina,

(qui ipsi summo Pontifici fuit ab epistolis) in vita Innocentij tertij. *Veneremur multa tum quidem in consultationem, nec decerni tamen quicquam aperte potuit, quod & Pisani & Genuenses maritimo, & Cisalpini terrestri bello inter se certarent: eò itaque proficiscens tollendæ discordiæ causa Pontifex, Perusij moritur.*

In idem recidunt verba Mathæi Parisiensis, (qui, eadem quâ conuocatum est hoc Concilium tempestate, floruit) in *historia sua minori. Concilium illud Generale, quod more papali, grandia prima fronte præ se tulit, in risum & scomma desit, quo Archiepiscopos, Episcopos, Abbates, Decanos, Archidiaconos, omnesque ad id Concilium accedentes, ludificatus est.* (Post discessum quippe Pontificis, ad sedandos tumultus inter Genuenses Pisanosque exortos, nihil actum est.) *Et cum nihil geri in tanto negotio cernerent, redeundi ad sua cupidi, veniam sigillatim petierunt. Quibus Papa non concessit, antequam sibi grandem pecuniam promississent, quam à mercatoribus Romanis prius accipere mutuo, Papæque soluere coacti sunt, antequam discedere Roma potuissent. Papa iam*

acceptâ pecuniâ , questuosum Concilium
dissoluit gratis , totisque Clerus abiit
tristis.

RESPONSIO.

Maximum , inquis vocabatur , eò
quòd numerus octingentorum Ab-
batum ac Priorum , (qui nullis in Concilijs
gaudebant suffragijs , nisi ex singulari Pa-
pe privilegio) duplo maior esset numero
Episcoporum. Verum est , iure eum Ma-
ximum vocatum esse ob hanc etiam ra-
tionem , quamvis non ob eam solam :
numerus quippè suffragantium , non
modò Episcoporum , qui potestatem
hanc iure communi sortiuntur , verùm
etiam Abbatum ac Priorum , qui eam
Summi Pontificis condonatione con-
cessûque acquirunt , ad Concilij ma-
gnitudinem plurimum momenti con-
fert. Hoc tamen concessio , magnitu-
dinem scilicet huius Concilij , numero
Episcoporum solo dimetiendam , quot
quæso maiora Concilia numerabis ?
cerrè paucissima , ideòque hoc non im-
meritò *Maximi* titulo insigniri possit.
Celeberrimi quoque , non ob hoc quòd

ais, tot nempè viros conuenisse & nihil egisse, sed quòd Ipse Summus Pontifex ei interesset, necnon duo Patriarchæ, reliqui verò duo per Legatos: quemadmodum per Oratores suos aderant Græcorum & Romanorum Imperatores, Reges Franciæ, Hispaniæ, Angliæ, Hierusalem, Cypri, cum multis aliis, prout inferius demonstrabitur. Quòd si nihil agere honorificum adeò sit, vt ea de causa alicui debeatut titulus noménque *Celeberrimi*, profectò non dubito quin hæ tuæ obiectiones, postquam luculenter innotescerint, communi omnium suffragio *celeberrimæ* sint iudicandæ,

Addis subinde, Platinam (cuius verba refers) *ipsi Summo Pontifici fuisse ab Epistolis*: quod vel planè abs re facis, vel vt innuas eum, ea de causa, fuisse rei gestæ peritiorem, aut historicum fideiorem, aut vtrumque. Prior quidem insinuatio non incōgrua fuisset, si Platina dicto munere perfunctus fuisset, illi Summo Pontifici sub quo Concilium hoc celebratum fuit; quo te collimasse cuius obuium est, quandoquidem clausulam illam tanti ponderis

parenthesi interposuisti. At certo certius est, eum multis post hoc Concilium annis natum fuisse, ac obiisse anno 1481. teste Trithemio de Scriptoribus Ecclesiasticis, prout in operibus Platinae refertur, pagina quæ est ante Epistolam proxima: inter quem annum, & dicti Concilij celebrationem, ducentorum sexaginta annorum spatium fluxisse reperitur. Captiosa igitur est ac veteratoria hæc tua observatio. Vel si re verâ, non animo alios decipiendi, sed ipsemet deceptus hæc effutisti, te præ scripturiendi pruritu, veritatis parcum indagatorem esse manifestè ostendis. Quod si verum esset, fuisse eum *ipsi Pontifici* (ut maioris energiae gratia exprimis) ab epistolis; attamen non tanti ponderis esset eius auctoritas, ut tot aliis gravissimis viris, quos oppidò ostendam diueria penitus ab his quæ tu illi tribuisti censuisse, præponderare deberet. Neque tandem ipse Platina illud in præiudicium huius Concilij asserit, quod tu erroneè eum docentem inducis; ut ex dicendis etiam liquidò constabit. Quod autem ad fidem eius in enarrando spectat, non

arbitror eam tibi magis probatam videri, eò quòd ais fuisse eum *ipsi* Pontifici ab epistolis: non utique qui de grege tuo sunt, Summo Pontifici tantum honoris ac venerationis deferre solent.

Sed ut ad eius verba veniamus: perperàm ea intelligis: nam quod ipse ait, *nec decerni tamen quicquam apertè potuit*, tu generatim de omni proposito negotio interpretaris; re tamen verà ad illud tantum caput referendum est, de recuperanda terra sancta; ut hæc antecedanea verba, à te fraudulenter rescèta, manifestè indicant: *At Pontifex ubi videret Saracenorum potentiam in Asia con crescere, apud Lateranum maximum Concilium celebrat, venère multatum quidem in consultationem, nec decerni tamen quicquam apertè potuit, quod & Pisani & Genuenses maritimo, & Cisalpini terrestri bello inter se certabant.* Hæc igitur verba, *nec decerni tamen quicquam apertè potuit*, ad summum, ad negotium illud particulare de transmittendis in terram sanctam suppetiis, ac coërcenda Saracenorum in Asia tyrannide, nec ad aliud quicquam sunt re-

ferenda. Quòd autem nihil ea de re decerni potuit, in causa erant memorata bella, quæ sanciendo aliis Canonibus impedimento esse nequaquam potuerunt.

Et sicut constat, ut plurimum, hunc Platinæ sensum fuisse, nimirum nihil actum esse quod ad bellum istud spectabat, proindeque textum hunc nihil è re tua facere, qui exinde singulos huius Concilij canones enervare conaris; ita non minus certum est, eum (si vel hæc eius sententia fuerit) non nihil in hac parte à veritatis tramite aberrasse, etenim de destinandis terræ sanctæ subsidiis deliberatum ac statutum esse, fidem certissimam facit Decretum Expeditionis in calce canonum appositum, de cuius veritate pluribus agetur inferius. Immò verò Platinam Decretum illud Expeditionis ne negasse quidem relatis verbis, *nec decerni tamen quicquam apertè potuit*, verisimile admodum redditur, eò quòd tunc simpliciter dixisset, *nec decerni quicquam potuit*: additio verò illius particulæ, *apertè*, aliquid decretum esse, licet non apertè, non obscurè subindicat. Et

certè non nihil decretum esse, ex iis quæ dicturus sum, luce meridiana clarius apparebit: quid verò sibi volunt hæc verba *non apertè* in eo quod decretum fuit, non apertum est. Fortasse nomine decreti, illius executionem significat, ac si dicat, nihil apertò Marto contra Turcas actum esse, quicquid in eos clam & per insidias gestum sit. Qui si verborum eius sensus sit, (quemadmodum necessum est, si eorum veritati consulere velimus) asserendum est, ea quidem nimis obscura esse, tibi verò parum admodum propitia.

At Naclerus huic obscuritati facem præbet, tibi oculos ex aduerso ferientem: de hoc ipso quippè negotio agens, ac ad reliqua quod spectat, eadem Platinae verba proferens, vice particulæ illius *apertè*, hanc non multum dissimilem *aptè* usurpat: *nec* (inquit) *decerni quicquam aptè potuit quòd & Pisani & Genuenses, &c.* scilicet, ingruente iam tunc bello in Europa: & verbis proximè subsequentibus (quæ te faucibus premunt, nihil ibi actum esse asserentem) subiungit, *editæ tamen nonnullæ constitutiones referuntur.*

Ad *historiam* autem *minorem* Mathæi Parisiensis quod attinet, certè in volumine omnium eius operum, tum maiorum, tum minorum, ubi de tempore huius Concilij aut Pontificis agitur, haud quicquam simile his quæ à te referuntur occurrit. Quòd si tibi animus fuisset, textum hunc æquo examini subiiciendi, leuius mihi utique onus imposuisses, quàm illum per integram historiam, siue maiorem siue minorem perscrutandi, (maximè cùm ex eo, cardo controuersię nostrę dependeat) nisi plus mihi negotij, quàm huiusmodi controuersiarum scriptorem cordatum decet, facessere statuisses: quod identidem in subsequētib; à te factum reperio. Attamen si verba hæc, & cum nihil geri in tanto negotio cerne-
rent, quæ sola instituto tuo fauent, verò apud authorem illum reperiantur, dicendum est, eum de Expeditione in terram sanctam locutum esse, id est, de illius effectu, non de Decreto ipso, ut verbum illud, *geri*, suo significato æquè innuere possit. Quòd si secus sentiret, profectò eum reigestę veritatem minus assecutum esse mox ostenderetur:

quanquam enim eodem quo celebratum est hoc Concilium tempore vixit, loco tamen dissitissimo. Et verba quidem illa, *in tanto negotio*, rem aliquam, certam definitamque indignant; quæ licet multoties conuocandæ synodo occasionem præbeat, ita tamen vsu comparatum est, ut à Patribus iam in vnum commissis, alia plurima ad Ecclesiæ utilitatem spectantia decerni soleant. Quamobrem etiamsi verum sit, nihil actum esse in magno illo negotio de bello Saracenis inferendo, nempe ob domestica Christianorum dissidia, valde tamen à veritate alienum est, quod tu mirâ quidem audaciâ exinde deducis, nimirum non modò non Decretum Expeditionis, sed ne vllum quidem alium Canonem ab hoc Concilio fuisse sancitum: *conuenerunt*, inquis, *at nihil egerunt*; nec tu meherclè quicquam aduersus eos egisti.

P. 877. C. Ut autem huiusce tui authoris fidem integritatēque magis perspectam habeas, perlege, si lubet, Annalium Baronij tomum vltimum, ad annum 1197. vbi Parisiensem hunc asserit, videri sibi non alio consilio historiam suam con-

texuisse, quàm ut Romanos Pontifices calumniandi ansam aucuparetur. Ibi-
démque post recensitam ab eo fabu-
lam, his verbis concludit: *Vidisti, Le-
ctor, Paris ingenium, animique malè com-
positi malam sententiam, res fingere, ver-
bâque formare indigna Romano Pontifi-
ce, & ab hoc uno tam patenti mendacio cæ-
tera discas, & caueas, videâsque qua tunc
sit homo fide dignus, cum totus sit in car-
pendis Romana Ecclesiæ Pontificibus.* Il-
lius itaque criminatio, qua Papam à
Concilij Patribus grandem pecuniæ
summam pro redeundi libertate exe-
gisse insinuat, uti primùm à tuo insti-
tuto prorsus aliena est, (quid enim Pa-
pæ avaritia ad euacuandos Concilij
canones?) ita demum omni veritatis
specie destituta videtur: ipse etenim
Paris, publicis ut vidimus monumen-
tis perstringitur, & calumniæ accusa-
tur; at Innocentij tertij fama, tam do-
ctrinâ quam moribus inuiolata, ubique
vagatur. Nauclerus virum eum appel-
lat *doctrina & moribus insignem.* Platina
etiam in eius vita, *Constat, inquit, eum
in quouis genere vitæ probatissimum fuis-
se, dignumque qui inter sanctos Pontifices*

Naucler.
vol. 2. pag.
876.

confeatur. Et rursus, verbis ab iis à te prolatis proximis, cuius vita adeò probata fuit, ut post eius mortem nihil eorum quæ in vita egerit, laudauerit, improbaueritque immutatum est. Cui ad amissim

Vol. 2. pag.
915.

*conuenit Nauclerus, additque, quæ & religionis àprimè studiosus erat. Tu verò susurro, quamlibet Summorum Pontificum æstimationem imminuendi an-
sam, patentibus vlnis amplecteris, quanquam veri non modò non simili-
tudinem, sed ne quidem umbram præ
se ferat.*

Iam verò falsissimum esse quod asse-
ris, nihil nimirum omninò actum esse
in hoc Concilio, qui scripti huiusce
tui vnicus finis est, cuique astruendo
Platinam ac Parisiensem obtorto quasi
collo in medium protulisti, clarissimè
ostendam. Imprimis autoritate Gre-
gorij Papæ noni, qui huius Concilij
celebrationis tempore vitam duxit, ac
vndecim decursis annis ad Summum
Pontificatum euectus est; is huius Con-
cilij Decreta ad iuris Canonici corpus
apponi iussit, quæ in re, operâ & studio
Raymundi vsus est, de quo Platina in
hunc modum scribit; *Raymundum au-*

tem Barchionensem, quo adiutore in compilando libro Decretalium Gregorius usus est, ita quidam tam laudant, ut maiori commendatione laudari nemo possit. Bi-

In vita
Greg. 9.
finc.

nius præterea, in vita Gregorij noni, hunc Raymundum à Clemente octavo in Sanctorum albo ascriptum fuisse testatur.

Ita Ann.
Ecclef. post
Baron. to.
13. pag. 459.
XV.

Deinde, id ipsum probo, grauiſſimorum illius ætatis Theologorum testimonio, Sancti Thomæ & Sancti Bonaventuræ, qui de præcepto annuæ confessionis sermonem habentes docent, Ecclesiam, necnon huius Concilij Patres, illius authores extitisse.

S. Tho. 4.
sent. dist. 17.
q. 3. art. 1. ad
3.
S. Bonau. 4.
sent. dist. 17.
q. 2. art. 3.

Denique, autoritate Conc. Tridentini, quod dum de eodem præcepto loquitur, illud Magni Concilij Lateranensis constitutionem esse affirmat. Quodque huius Concilij acta semper in Ecclesia viguerint, ac pro genuinis nunquam non habita fuerint, hinc inde manifestè euincitur, quoniam à tempore Gregorij noni, eiusque iussu, in hunc usque diem iure Canonico inserta permanserint. A quo etiam Pontifice, anno 1234. annis ab ipso celebrato Concilio vnde viginti,

Conc. Trid.
sess. 14. can.
8.

Annal. Ec-
clef. post
Baron. to.
13. anno
1234. XV.

eorum collectio autoritate Apostolica comprobata est. Nec cuiquam alteri opportuna magis horum Canonum veritatem indagandi copia superpetebat; utpotè qui in eo Concilio lata fuissent, cui præsidebat auunculus eius; in illa vrbe, in qua ipse paulo post ad Pontificatum euectus, tabulas omnes ac literarum monumenta, prompta & parata habebat. Multi insuper eorum numero qui huic Synodo interfuere, tunc cùm hi Canones constituti sunt, adhuc in viuis superstites erant, qui proinde melius ac certius nosse poterant, quid in eo actum esset, quàm qui longius aberant, siue tempore, ut Platina, siue loco, ut Parisiensis; si tamen ab iis quicquam, quod huic veritati refragetur, dictum sit. Nec verisimile quidem est, potuisse, nedum voluisse Gregorium Papam, tot præsulibus & principibus suppositios canones obtrudere; nec Ecclesia Catholica, (cuius tunc res maximè agebatur) aut gestorum suorum æmuli, tam audax facinus silentio præteriissent.

Postremò, sancitos esse in hoc Concilio canones, eosque etiam in Anglia

receptos fuisse, (quod tu sub finem libelli tui perfrita fronte negas) auctoritate generalis Angliæ Concilij confirmatur; Oxonij à Stephano Cantuariensi Episcopo habiti, anno 1222. septem non nisi annis ab hoc Lateranensi, duodecim verò antequam dicti canones à Gregorio nono in Decretalibus digesti essent; vbi calce Concilij refertur: *Vt autem omnia sine bono concludantur, Lateranense Concilium sub sanctæ recordationis Papa Innocentio celebratum, in præstatione decimarum, & in alijs capitulis precipimus observari.* Sed hæc minima pars eorum est, quæ aduersus hoc Concilium affers. Nam

Math. Paris.
hist. ma. an-
no 1222.

Biniij Con-
cil. tom. 7.
part. 2. fol. 8.

C O S E N V S.

MVLTA insuper sunt, quæ nobis prætenti huius Magni Concilij auctoritatem meritò suspectam reddant.

Nam primò, priusquam illud Cochleus in lucem edidit, nusquam extabat: nec ita tamen pridem ab eo editum fuit, anno nimirum 1538. Tribus duntaxat antea annis, Merlinus suam

Conciliorum collectionem cum in lucem edidit, nullum tale Concilium illi occurrebat, vnde nec in illius editione continetur. At Cochlæus (vir non adeo probatæ fidei, quique multa in scribendo Lutheri vitam finxisse deprehenditur) asserit, se huius Concilij Decreta, ex peruetusto codice deprompsisse: sed vndenam hunc codicem acquisiuerit, quisve illius author, aut cuius tandem ponderis fuerit, negry quidem. Verisimile est, non alium fuisse hunc peruetustum codicem, quam Decretalium volumen, in quo sparsim hic illic continentur ea, quæ ab ipso in hoc Concilio statuta esse perhibentur. Hæc fragmenta, credo, Cochlæum aut alium quempiam in vnum collegisse, & in formam viamque Concilij compaginasse. Formâ tamen ita rudi ac impolitâ, vt multoties ipsum se prodatur genuinum non esse, & ex aliquo probato exemplari desumptum.

RESPONSIO.

PErgis, & ais, multa in super esse que præteriti huius Concilij (sic enim illud

illud modestiæ tuæ compellare lubet) *authoritatem meritò suspectans reddant.* Facile mihi persuadeo, permulta quidem esse, quæ huius, aliorumque Conciliorum vniuersalium authoritatem non modò suspicandi, verùm etiam penitus reiiciendi, sed inmeritò, tibi causam præbeant. Non autem huius Concilij authoritatem, quæ illi cum reliquis omnibus, etiam à te agnitis, communis est, sed canonum potius ac constitutionum veritatem,, fidemque astipulatorum, tibi homini supra modum cauto ac sagaci, suspecta dixisses. Quæ si tibi e mentita videantur, quantumvis unanimi omnium per orbem orthodoxorum consensu, ac suffragiis comprobata sint, quid obsecro illorum astruendæ veritati par esse poterit? Num vnus e mentiti Decanuli vox (qualis tua est) tot testiũ congeriem dissipabit? Enimvero, si Concilium istud tuo iudicio non nisi *prætensò* magnum habeatur, quod siue numerum spectes, siue personarum tum Ecclesiasticarum tum secularium, è quibus conflatum est conditionem, nulli alteri post hominum memoriam postponi debeat., haud

ægrè inducar vt credam, lumen illud rationis quod cæteris hominibus à natura inditum est, tibi non nisi prætentè inesse. Annon Platina, *ipsi Summo Pontifici ab epistolis*, proximè post verba à te relata, disertè sic ait? *Pontifex apud Lateranum maximum Concilium celebrat.* An non etiam tuus ille Mathæus Parisiensis, vt quàm plurimos sanioris fidei testes prætermittam, illud *Generale* nominat? Quâ igitur fronte Concilium hoc Generale irrisoriè, nec nisi *pratentè Maximum* vocitare audes? Imò verò non modò non Generale, sed ne quidem Concilium omnino, vt sub finem huiuscæ tui scripti dicere non puduit? Tu scilicet formidabilis & horrendus ille Goliahes, qui solus integrum Israëlîs exercitum prouocare non vereris, cui tamen quilibet pusillus David, tuo ipsius gladio caput amputare valet.

Iam verò, illæ tuæ ratiunculæ, quibus veluti cuniculis, Concilij huius canones subuertere moliris, tam enervæ sunt & elumbes, vt nihil nisi imperitiam tuam exploratam reddant. Quarum altera est, quod in Merlini editio-

ne, nulla huius Concilij mentio habeatur. At argumentum hoc parum firmamenti aut roboris habet; quandoquidem plurima alia Concilia extitisse constat, quæ tamen à Merlino prætermissa, postmodum in lucem prodire, quod nec ipsos credo Protestantes vel lenegare. Qualia fuere Nicenum secundum, quatuor Lateranensia, duo Lugduni, vnum Viennæ, vnum denique Florentiæ habitæ. Quod quidem Florentinum, post reliqua ab Authore illo recensita celebratum est, omniumque nouissimum, octoginta tantum annis editionem Merlini præcessit; cuius nihilominus acta, ab eo haud quam reperiri poterant: vel certè (quod non verisimile est) de industria prætermisit: quantò igitur faciliùs eum subterfugere poterat hoc Lateranense, trecentos retro annos conuocatum? Constat insuper, nec illius sæculi gentem Catholicam, nec Merlinum ipsum credidisse, omnia & singula Concilia ab eo collecta fuisse. Huius testis imprimis est Christianissimi Regis Diploma operi præfixum, tum etiam ipsius authoris verba, in epistola quæ secun-

do volumini præsternitur. Verba quidem Diplomatis regij sic se habent: *Concilia quæ in Ecclesia à temporibus Apostolorum, usque ad concessum Basiliensem celebrata, potuerunt coaceruari. Ex quibus, quamuis appareat edita fuisse quotquot coaceruari poterant, non tamen coaceruata fuisse quotquot unquam extiterunt. Ipsius autem Merlini verba hæc sunt: Nam si authentica, integra, solida, & à mendis expertia fuerint exemplaria, unde hæc fideliter excerpta sunt, apprimè castigata sunt, pura, vera, & sincera quæ profero, suorum archetyporum quidem germanam conditionem præ se ferentia, quæ sigrato animo tuleris, propediem confide ampliora nostris te sudoribus affecuturum.* Hinc etiam non minùs euidenter patet, ipsius authoris sententiâ, alia superfuisse Concilia quæ illius collectione nequaquam comprehensa fuerant. Iam verò videre nequeam, qua lege tibi liceat argumentari, ex eo quod nulla huius Concilij mentio habeatur, idcirco nullum tale unquam extitisse: præsertim cum argumentum istud, non minore robore militet aduersus octo supra recensita

Concilia, quæ ab authore illo prætermiſſa notauimus.

Alterum cautiffimæ ſuſpitionis tuæ fundamentum eſt, quod Cochleus omnium primus Concilium hoc in lucem ediderit, idque vt ais, non ita pridem: vnde non ſolum hominem perſtringis, verum etiam tempus edendi. Ad perſonam Cochleæ quod attinet, eum non vſquequaque inconcuſſæ fidei perhibes; quod ne temerè dictum videatur, eum in ſcribendo Lutheri vitam plurima finxiſſe criminariſ. Ad tempus quod ſpectat, ſummoperè tibi diſplicet editionis huius nouitas, quippe quæ nuperrimè in lucem prodiit, anno 1538. poſt editionē Merlinianam tribus videlicet aut eo ampliùs annis. Primò, dictorum veritatem perpendam, deinde eorum vim & efficacitatem. De editione huius, vel cuiuſlibet alterius Concilij à Cochleæ, ne verbum quidem vllum inter ſcriptores inuenire potui. Solus Bellarminus, libris controuerſiarum, eum in eorum numero reponit, qui de Conciliis ſcripſerunt; attamen nullam huius operis, libro ſuo *de Scriptoribus Eccleſiaſticis*, commemo-

rationem facit, vbi reliqua eius opera omnia ordine recenset: quod etiam hic Parisijs sedulò, sed incassum perquisiui. Vt autem cunque sit, non equidem video cur non illi, æquè ac Merlino fides sit adhibenda; quem Bellarminus, *virum doctissimum, & fidei Catholicæ propugnatorem eximium*, appellat. Imò verò tua potius, non modò vacillat, sed planè corruiat fides, qui de hominis innocentis fama detrahere non erubescis; dum tuæ interim ferè innumera corruptiones, non in hoc modò, sed etiam in aliis tuis scriptis, manifestè redarguuntur. Quòd autem ais, cum plurima in scribendo Lutheri vitam finxisse, calumniarum altera pars est; quam sicuti probare non satagis, ita sine dubio nullatenus vales. Quanam etenim ratione, tu alterius arcana cordis, vnde oritur fictio, rimari poteris? Non inficias ibo eum in aliquibus errare potuisse, sed quòd error huiusmodi ab eius fictione manaret, & non magis ab eorum simili errore quorum hac in re testimoniis vsus est, tibi aliunde quàm suo ipsius ore compertum esse nequit: quod tamen à te nec hætenus

probatum est; imò nec omnino quicquam ab eo de Luthero scriptum esse, quod puriori veritati vllatenus aduerfetur.

At verò hæc Cochlæi editio, etiam nouitatis gratia tibi in suspensionem venit; scilicet, quæ nuperrimè in lucem prodiit. Dic sodes, quid vocas nuperrimè? Anno inquis 1538. ab hinc certè duodecimo supra centesimum; quod quidem comparatè ad Apostolorum tempora, nuperum dici potest; si autem siue artis typographicæ, quæ non nisi ducentis plus minus annis primùm adinuenta est, siue vulgaris loquendi vsus habeatur ratio, neminem sanæ mentis futurum existimo, qui librum ante centum & duodecim annos typis mandatum, nuperrimè in lucem editum existimabit. Multò minùs hoc tibi, fas esse poterit, qui Merlini opus inter vetustiora reponis, quod tribus duntaxat annis, modò factus es, illud alterum antiquitate superare. Paradoxi instar erit, Merlinum anno 1535. scribentem, inter veteres, Cochlæum verò anno 1638. inter recentiores scriptores annumerare. Num triennium, centum &

duodecim annis superadditum, tantæ molis esse poterit, ut hunc præ illo recentem reddat, eoque nomine, quod ais, suspectum? Sine dubio si quid hoc tuum argumentum in alterum valeat, in alterum etiam valebit: sicque de præcoci tua prudentia, Concilia omnia à Merlino edita, tibi in suspensionem venire poterunt. At ego in gratiam suspensionis tuæ hoc addam, Merlinum Concilia sua in lucem edidisse, anno 1524. ut ex ultimis totius operis verbis colligitur; adeò ut Cochlæi editio iuxta tuammet supputationem, quatuordecim planè annis editione Merlini tempore posterior fuit. Iamque ut tuum hoc qualecunque argumentum in te retorqueam, tantùm abest ut editionis Cochlæi nouitas, cuiquam imposturæ suspensionem creare debeat, ut contrà, nihil magis ad illius integritatem vindicandam faciat. Omnino etenim casu factum videtur, ut Concilia fuerint typis excusa; poterant sanè in hunc usque diem manuscriptis obuoluta latuisse; num hoc illorum omnium fidem suspectam reddidisset? Annon potius hæc tua suspicio ingenij tui debilitatem ne

dicam suspectam, multò magis certam exploratamque reddidit? At verò postquam sic se res habuerit, ut subinde à variis authoribus summo studio ac industria publici iuris facta fuerint, quò certè hoc cōtigit recentius, eò æquum est credere emendatiora extitisse exemplaria. Multò etenim vberior hinc oritur copia, ex diuersorum textuum collatione, purum ac genuinum authoris sensum indagandi; sicque quotidiano ferè usu experimur, posteriores librorum editiones (modò nihil debitæ curæ desideretur) castigatiores euadere. Nec enim te dicturum existimo, recentem operum sancti Ioannis Chrysostomi editionem, à nobilissimo viro Henrico Sauillo, Anglo, Equite Aurato dudum diuulgatā, ea de causa suspectam magis habendam esse. Ad eò ut nulla suspicionis tuæ fundamento subest veritas, nec etiamsi verum hoc vltimum esset, æquum est ut suspicionis fundamentum habeatur.

Adiicis, Cochlæum asserere, *se huius Concilij decreta ex peruetusto codice deprompsisse; at vndenam, inquit, hunc codicem adeptus sit, quisve illius author, aut*

cuius tandem nominis fuerit, nos certiores neuntiquam facit. Cæterùm vt te in coniiciendo nihilo minus fœlicem monstrares, quàm modò vidimus in suspicando, verisimile tibi videri dicis, per vetustum hunc codicem, illum ipsum fuisse Papæ Decretalium, vbi suppositij hi canones hic illic promiscuè sparguntur. De Cochlæo quidem nihil habeo quod reponam, cùm vt antea monui, hoc eius opus nullibi reperire queam, neque facile credam, ex iis quæ superius dixi, eum vnquam opus tale edidisse. Interim do tibi vera esse quæ ex illo affers; quotsum autem ista, sanè non intelligo. Quòd enim ex peruetusto codice hos canones desumpserit, nonne plurimùm ei fauet? Quem codicem (si mihi tecum perinde coniecturis agere liceat) ipsissimum fuisse huius Concilij Archetypum spondere ausim: vndenam verò illud acquisuerit tua non refert. Et hæc mea coniectura, epistolæ cuiusdam auctoritati velut stabili fundamento innititur, quam in editione Conciliorum à Crabo facta, huic (de quo sermo est) Concilio præfixam reperio; hoc titulo præ-

notatam: *Bartholomæus Laurentius Nouimagensis Lectori*, cuius fronte hæc habentur verba. *Hæc sunt quæ ex Archetypo illo, cuius supra mentio fit, lectu adeò difficili, summo labore descripsimus; quæ si cui grata & utilia fuerint, primùm gratias agat Deo, qui horum qualecunque exemplar huc usque seruauit: deinde F. Petro Crab, qui hoc ipsum ut inter Concilia ederetur procurauit. Atque hæc forsitan præfatio illa est, quam tu Infra memoras, eamque perperam Cochlæo ascribis, aliam etenim nullam inuenio. Cuiuscunque demum sit, hinc apertè colligere licet, Concilij huius acta, (quæ primùm quoad ego consequi possum, à Petro Crab diuulgata sunt,) ex primæuis monumētis depròp̃ta fuisse, quo nihil ad eorum authoritatem stabiliendam neruosius excogitari potest. Vnde etiam inferius in eadem epistola subiungitur, *certè in editione hac sedulò curatum est, ne quicquam ei ab Archetypo alienum ingeri possit.* Et in hac quidem editione continetur Decretum illud Expeditionis, vnà cum reliquis quæ tu speciatim posthac tanto studio irrita reddere conaris: vnde &*

obiectionibus illis prius responderetur, quibus tamen suo loco sigillatim diceretur. Age igitur concedamus tibi Decreta hæc è summorum Pontificum Decretalibus (perdito nempe Archetypo) collecta fuisse, (sicuti Canonibus primi Concilij Niceni accidisse fertur, vnde de illorum numero tanta est incertitudo) in quæ paulò post eorum constitutionem, à Gregorio nono, sub diuersis titulis inserta fuere, (quod tu contemelosè hic illic spargi nuncupas,) adèd vt collectori variis ex locis ea repetere necesse fuerit, num obsecro hinc illorum violatur authoritas? His sanè summorum Pontificum Decretalibus omnes orthodoxi magnum semper honorem habuère, quicquid tu impudenti illâ fragmentorum appellatione obgannias. Nec enim expectandum est Conciliorum hîc talem collectionem reperiri, vt suus cuique canonî seruetur ordo; sed potius quorumcumque Conciliorum eiusdem argumenti canonum, sub vno capite dispositionem: collectionis illius instar, quâ à Rastallo & aliis, Statua regni Angliæ in diuersa eiusdem argu-

menti capita rediguntur, (è quibus si quis leges, regnante Elisabetha latus, conaretur extrahere, ex centum fortasse variis locis eruendæ forent) quam quidem optimè digestam viam, vix te existimo vagam ac temerariam dispersionem nuncupaturum. At hoc vulgare illud opprobrij genus est, quod in summum totius orbis Christiani Patrem ac Pastorem, ab iis ore sacrilego ingeri solet, quos vindex Deus ob funestum illud in Ecclesia conflatum schisma, instar Simeonis & Leui, *diuisit in Iacob, & dispersit in Israël*. Cæterum vndecumque primus ille huius Concilij vulgator hos canones collegerit, clarè liquet, illos ex omni ætatum memoria, & ab antiquissimis temporibus genuinos agnitos fuisse; atque huic Concilio ascriptos, testimonio omni exceptione maiore, totius nempe Cleri Anglicani, in Concilio Oxoniensi (vt superius monstraui) congregati, idque duodecim prius annis quàm Codex ille Decretalium conscriptus fuerit: ita vt altundè quàm ex hisce Decretalibus eos originem suam trahere necessario fatendum sit.

Eandem verò cantilenam denuò recinens, *hac*, inquis, *fragmenta* (crediderim) *Cochlaum*, vel alium aliquem in unum collegisse, & in formam Concilijque modum compaginasse. Formâ tamen ita rudiac impolitâ, ut multoties ipsum se prodât genuinum non esse, nec ex aliquo probato authore desumptum: Dixeras modò, nullâ interpositâ dubitatione, *Cochlæum* huius Concilij acta primum in lucem edidisse, nunc vel illû vel alium aliquê huius editionis authore statuis; quâ sane argutissimâ ratiocinatione victus, non possum non tibi candido manus dare: nihil enim magis pro comperto habeo, quàm si vnquam editum est hoc Concilium, vel illo vel alio aliquo authore id euenisse. Quodd si à *Cochlæo* editum non est, huiusce profectò editionis ergò, dum nomini suo infamiam inferre conaris, planè oleum & operam perdidisti. Si verò eam alio cuipiam ascribas, non est cur *Cochlæi* causâ, in perniciem huius Concilij tam vehementer incumberes. Tuncque ego asserere non dubito, illum alterum tantæ authoritatis virum extitisse, quanta potest esse maxima: sicque

tuo rursus telo confoderis. Nec etiam (quod mirum est) quicquam affers quo huius *alius* nomini infamiae notam inuras : poteras namque æquo iure iis obloqui quos ignoras, ac (quod totâ hac oratione agis) illa garrere quæ omnino non intelligis. Cochlæi silentium modò ægrè ferebas, quòd vndenam hunc codicem adeptus sit, te certiorrem facere prætermisit; an non multò magis nos tibi succensere par est, quòd collectorem huius Concilij in quod tantâ libidine inueheris, nequaquam nobis sine ambagibus ostendis? imò nec editionem hanc præ aliis (à nescis quo scriptam) vel minimam dignoscendi copiam suppeditas? At quantum nos in hac parte conceptâ spe frustras, tantum in sequentibus strenuè in nos irruere tibi videris; dum licet nescire te fatearis quis primus hoc Concilium in lucem ediderit, nullâ tamen ad authorem collatione habitâ, ipsissima huius Concilij forma, ais, *adeò rudis est ac impolita, ut multoties semetipsum prodat genuinum non esse, aut ex aliquo probato exemplari desumptum.* Quæ grauis sanè sed intempestiva cep-

fura in te mox retorquetur, suâque serudi formâ, dicam, an deformitate prodet, non modò non ex literarum fontibus exhaustum, sed ne communi quidem sensu, vel authoritate, aliqua obstericante productum.

C O S E N V S.

QUis etenim sibi animum inducere poterit ut credat, fieri posse, ut Concilium hoc Lateranense, decretis canonibusque ibi sancitis, Concilium Lateranense citaret? id est, seipsum citaret, non tanquam Concilium tunc temporis sedens, sed multis retro annis (aut saltem aliquot) habitum? Aliorum quidem Conciliorum huiusmodi solet esse loquendi formula; *Hæc Sancta Synodus decernit, siue placuit huic Sanctæ Synodo*, quæ verba sessionem sonant, iam tunc cum statuta feruntur superstitem. At Concilium hoc Lateranense de seipso loquitur, tanquam de alio quopiam Lateranensi Cōcilio, ab eo quod tunc celebratum fuit longè diuerso; vnde vocibus utitur, *Fuit & nescitur fuisse*, tanquam de decretis an-

tealatis; idque variis in locis, non minus quam sexties; semel cap. 11. bis cap. 29. ter capitibus 33. 46. 61. *In Lateranensi Concilio pia fuit institutione prouisum. De multa prouidentia fuit in Lateranensi Concilio prohibitum. Deuoluatur collatio secundum statutum Lateranensis Concilij. Et in Lateranensi Concilio noscitur fuisse prohibitum.* Ecquis hæc verba ipsius Concilij Lateranensis esse crediderit?

RESPONSIO.

ECQUIS arbitrabitur hæc verba hominis esse, nisi quem mens simul cum ratione destituit? Quis etenim crediderit, quis sibi æquo animo persuaderi patiatur, virum aded nasutum, suæque sectæ columnam, alicui Concilio huiusmodi litem intendisse, quâ, ut leuissimè dicam, nihil vnquam credo, in hoc genere ineptius in publicum prodiisse? Ais etenim Concilium iam tum cum haberetur, sua ipsius acta referre, quasi alterius cuiuspiam iam olim celebrati. Quod ut astruas, sex varios textus profers, in quibus Concilij quidem Lateranensis fit mentio;

quod tu insulsè nimis, vnum idemque opinaris atque illud de quo in præsentiarum agitur. Scito igitur, (at erubescere si potes tam turpi ignorantia) Concilia omnino quinque apud Lateranum habita esse, (ut fert vulgaris, multoque maximè recepta sententia) quorum tria, hoc de quo nunc quæstio est, præcesserunt: illudque cuius tu verba acuratori quàm aliàs diligentia profers, sub Alexandro tertio, anno 1180. huic proximè præcedens celebratum est. Tunc igitur solus in his hospes es? tu inquam, quem eo supercilio quandoque loquentem vidimus, perinde ac si omnibus Conciliis Notarij munere perfunctus fuisses, tam densis ignorantia tenebris obuolueris; ut quod tyrunculus quisque nouit, te lateat Doctorem? Vnde factum est, ut Concilij Lateranensis mentionem reperiens, suaque Decreta citata, cæterorum nescius, idem suimetipsum verba referre arbitrareris. Quòd si modò Bini Editionem inspexisses, singula hæc testimonia à te adducta, suis quæque capitibus vnde eruta essent, in margine prænotata vidisses; Concilio scilicet

Lateranenſi, ſub Alexandro tertio, ſuperius nominato. Sed fingamus Concilij huius canones à Cochleæ, aut alio neſcio quo conficta fuiſſe; (quod tu mirâ vanitate ſuſpicaris) putasne ſerio eum uſq; ad eò rationis expertem fuiſſe, ut tam obtuſum impoſturæ genus, nemine id explorante, hominum oculis obtrudere ſe poſſe ſperaret? vel ſi crediderit aliquando patefactum iri, (quod væ miſero! perſpicaciſſimâ tuâ ſagacitate iam tandem euenit) num etiam eò dementiæ prolapſum autumabis, ut rem ageret in ſe non modò abſurdiſſimam, ſed nulli inſuper fini, (quippe cui perinde foret, an vlla Concilij Lateranenſis acta ab hoc Concilio citata fuiſſent necne) imò verò, quod ſummum eſt, quâ eius inſtituto, conciliandæ nempe huic ſuæ editioni hominum fidei, nihil magis alienum aut aduerſum excogitari poterat: hinc etenim concuſſis veluti fundamentis, inuitabilem ſui operis ruinam non poterat non præuidere.

Vt cumque verò, pro tumido tuo genio, minimè vereris priuos paſſim Catholicos, pietate licet ac eruditio-

ne spectatissimos , fastidire ; & linguâ
petulantissimâ confectari ; attamen (vt
verbis istis tibi adeò familiaribus vtar)
miror quâ audaciâ, omnes vniuersim or-
thodoxos ignorantia, inaduertentia,
perstringere attentares. Quasi verò tot
Ecclesiæ Catholicæ Pontifices Maxi-
mi , tot Episcopi, tot Theologiæ nec-
non Canonici Iuris Magistri, præter
alios innumeros omni literarum gene-
re apprimè insignes ; ij etiam quorum
maximè intererat Concilij huius sincer-
itati consulere , sæculares nimirum
Principes, eorumque subditi nec nu-
mero pauci, nec literis parum instru-
cti, imò magnâ ex parte instructissi-
mi , tam profundâ mentis cœcitate
aut torpore laborauerint, vt prodigio-
sum hoc commentum deprehendere
non valuerint , aut eo deprehenso,
si de clero fuerint , vt nec pro eorum
pietate in Deum, nec reuerentiâ in ho-
mines illud vtique detegerint : Si verò
de populo , vt saltem priuati cuiusque
commodi gratiâ, aut prudentiæ huma-
næ intinctu , tam insigni imposturæ
non reclamauerint ; quin potius passi
sint adulteratos hos canones , specioso

Magni ac vniuersalis Concilij titulo dealbari, eoque nomine per totum terrarum orbem recipi, idque tot annis vertentibus, quoad tu, ineluctabili tuâ solertiâ, myſterium hoc iniquitatis, reducto velamine, æternæ Catholicorum omnium ignominix, tuæque (vt ſine dubio opinaris) non minori gloriæ detegisti.

At hinc certè tibi videre licet, quàm facilè & inopinatè qui veritatem ſuperbâ peruicacia oppugnant, in eandem incidant infamiæ ſtultitiæque foueam, quam aliis præparauerant. Tu nihilominus maiori animo quam cautela pergis, & ais,

C O S E N S.

H V I C igitur turpetudini, quaſi fuco quodam mederi nititur Cochlæus, hac coniecturâ, (in præmio huius Concilij à Crabo edito,) fuiſſe nempe hæc decreta in vnum collecta, inque ordinem quo ab illo exhibentur redacta, per ipſummet Innocentium Papam, aliquo poſt abſolutum Concilium temporis interuallo. In quem finem, tria capitula dicti Concilij citat, (de eorum numero quorum ſuperius

mentionem fecimus) additque, lectori facili negotio idem deprehensurum. At quisnam prudens lector æquo animo feret, Concilij decreta aliquo temporis curriculo post eius dissolutionem conscribi? Moris semper erat Conciliis, sua quæque decreta scriptis mandare, nec finem prius imponi fas erat, quàm illis etiam esset subscriptum. Sed neque Innocentius Papa rerum agendarum adeò imperitus erat ut ipsam Synodum Lateranensem in hunc modum loquentem introduceret: *In Lateranensi Concilio noscitur fuisse prohibitum, vel fiat hoc, secundum quod prouisum est in Lateranensi Concilio, &c.* Quod genus orationis, multum abhorret à vulgari stylo viaque loquendi, quoties alicui Synodo de seipsa sermo habeatur. Neque hoc Innocentium tertium vlllo modo latere potuit.

RESPONSIO.

COCHLÆVM modò nefandi criminis reum feceras, nunc eum sese purgantem introducis, utrobique non sine contumelia. Nec enim quidquam

simile huic, de qua loqueris, conjecturæ usquam reperitur; nec si reperiri posset, omninò aliquid tibi opis aut præsidij est allatura. Ais eam in proæmio huius Concilij à Crabo editi contineri; at multò faciliùs sibillæ folia colliges, quàm huiusmodi proæmium inuenies. Extat quidem Bartholomæi Laurentij epistola quædam, quam supra commemorauimus, quâ hanc Concilij editionem ex ipso Archetypo desumptam esse probauimus, quod nullâ sane indiget excusatione. Ad hæc, verisimile non est Cochlæum (quem huius Concilij decreta primum scripsisse modò asserebas) alienæ nescio cuius editioni proæmium fore postmodum concinnaturum. At verò supponamus hæc ab ipso afferri coniecturam, scilicet, *hæc decreta collecta fuisse ab Innocentio Papa, inque formam hanc disposita, aliquantisper post factum tectum Concilium,* qualis obsecro erit hæc excusatio? si namque veritati nitatur, penitus de tua causa actum erit; hinc etenim clarissimè euincitur, omnia hæc decreta à Concilio stabilita fuisse: sin autem falsa sit, nihil prorsus ad rem facit. At se-

quelas hinc inde deducis, quæ quidem ieiunæ admodum sunt & pueriles, à fronte, à tergo, à lateribus labascentes, quibus dum velut adminiculis desperatæ tuæ causæ ruinas fulcire conaris, hoc tantum agis, vt debilitatem ingenij tui cunctis exploratiorem reddas.

Hic iam sciscitaris, *quis lector æquo animo feret, Concilij cuiuspiam decreta aliquandiu post eius dissolutionem conscribi?* Imò verò quis hoc, (te vno excepto) feret iniquè? Enimverò si Concilij alicuius acta, prius scriptis demandata fuissent, quàm Concilium ipsum conuenisset, non sine causa interrogasses, quis illud non ægrè ferret? at quærere, cui arridere velit, ea scripta fuisse, sine iam tunc Concilio imposito, planè ridiculum est; & lectorem etiam seuerum in cachinnos se soluere coget. Cæterùm quòd hæc decreta (vt in relata coniectura perhibetur) in formam rationemque quâ nunc sunt, redacta fuerint, postquam Concilio finem imposuere Patres; tu hinc argutè colligis, sub nulla penitus forma, imò non omninò quidem in Concilio exarata fuisse. Cui instituto subnectis, id

moris esse Conciliis, ut sua quæque decreta conscriberent, eademque (quod appositè admodum suggerere tibi videris) suâ manu Patres consignarent, priusquam discedere cuilibet fas esset: quo nempe innuas, in hoc Concilio secus se rem habuisse. Et hoc hinc liquidò tibi constare videtur, quoniam (ut ais) Innocentius Papa hos Canones in formam modumque Concilij redegerit, aliquandiu postquam Concilium clausurunt Patres. Parum sine dubio tecum recogitasti, qualem de prudentia tua sententiâ æquus quisque arbiter haberet, qui te hunc in modum differentem legeret; tam insulsè sane, tamque inappositè, ut haud sciam si cuiquam mortalium quid unquam simile in mentem venerit. Appello quotquot rationis usu gaudent, eorumque iudicium depono, an hæc decreta in & à Concilio hoc conscribi, atque etiam consignari minimè potuerint, & tamen aliquandiu post, ab Innocentio Papa in hanc formam methodumque redigi, sub quibus modò exhibentur. Omnibus certè hominibus lumen rationis prius eripias neces-

se est, quàm hæc discrepare persuadere possis. Imò verò hæc eorum digestio aliquandiu post ab Innocentio facta, argumento est, (multò secus actibi videtur) ea antehac sub aliqua certè formula extitisse. Aliàs, vndenam obsecro ea Pontifex colligeret? An ex suo cerebro? At hoc ineptissimum est. Collectio namque rerum adinventionem præsupponit, easque veluti certis quibusdam monumentis reconditas, nouâ quadam facie reuiuiscere facit. Quod si collectionis huius authorem Innocentium astruere velimus, æquum est vteam ex Archetypo depromptam esse credamus; quandoquidem Innocentius huic Concilio non solùm interfuit, sed etiam præfuit. Hoc tuum igitur argumentum tantumdem valet, ac si quis in hunc modum ratiocinaretur; Prophetarum & Apostolorum scripta, in hanc formam viamque quâ impræsentiarum videntur, diu multumque post redacta sunt quàm illi mortem optetierunt, igitur nec ab iis, eorumve Amanuensibus, ab initio scripta fuere.

Multùm denique Innocentio Papæ

operam nauas, vt illum ab huius imposturę crimine liberares, quippe quòd ille non adeò rudis & indoctus fuit, nec rerum agendarum adeò imperitus, vt hanc Synodum suamet ipsius verba referentem, seipsamque citantem adduceret. Cui quidem labori, si me audiisses, vtique pepercisses: etenim *quis* (quæso) *vnquam vituperauit Herculem?* Quis huius criminis insinulauit Innocentium? Tu quidem à Cochlæo hoc factum opinaris, quia nempe coniecturam facit, vt ais, in formam quam præ se ferunt decreta, ipsius operâ digesta fuisse, aliquantò post dissolutum Concilium. Quasi verò Concilij alicuius decreta colligere, inque nouam aliquam formam redigere, idem esset atque eadem confingere; quo nihil homine sensum habente indignius excogitari potest. Fuit illa Innocentij Papæ prudentia, (dicis verè) & inscribendo dexteritas, vt Concilium seipsum citantem nullatenus adduceret; fuit ille rei suæ magis peritus: tu verò cāratiōnis penuriā laboras, vt tam claram veritatem (quam etiam nullus vnquam oppugnauit) aliter tueri nequeas, quàm

falsitate insigniori; quâ scilicet asserere non vereris, Concilium hoc sui ipsius canones in testimonium asserre. Quòd si tu redarguendi artem æquè calluisses, ac Innocentio probè nota erant Conciliorum stylus ac norma loquendi, satiùs sine dubio tuæ famæ silentio, quàm tam debili erroris defensione consuluisses. Pergis verò, & ais,

C O S E N S U S.

Consultissimum itaque erit, Platinae verbis acquiescere: *non est decretum ibi quicquam: non potuit ibi decerni quicquam. Improbavit Innocentius ipse Abbatem Joachimum libellum, damnavit ipse Almericum.* Dicit non fuisse Concilium Lateranense quod ad eos condemnandos decreta tulit, sed Innocentium ipsum fuisse qui eos condemnavit. Et appositè concludere possimus, cum hæc tum alia, *de quibus nihil decerni potuit in Concilio*, ab ipso Papa in suis Decretalibus descripta fuisse; unde hos canones decerpfit, quisquis ille fuit qui primus eos in Concilij formam redegit.

RESPONSIO.

RECTISSIMÈ consulis, vt Platinæ fide-
dem adhibeamus; Platinæ conce-
do, non autem tuæ verborum eius in-
terpretationi; quam in præcedentibus
fatis superque refutauimus. Quicquid
autem de illo sit, consultissimum sanè
erit nullam prorsus tibi fidem habere,
qui non ipsum modò sed nos etiam, in
omni hoc quod adduxisti, non leui in-
iuria affecisti; nihil enim huius nouæ rei
asseritur, cui non in initio abundè satis-
factum sit. Totum id quod dicit est,
nec decerni quicquam apertè potuit: cuius
loco tu eum ita loquentem facis: *non
est decretum ibi quicquam: non potuit ibi
decerni quicquam*. Vbi præter redupli-
cationem commutationemque verbo-
rum, voculam *apertè*, à quâ tota quæ-
stionis decisio pendet, subdolè elisisti;
quòd ab ea te elidi sentiebas. Ait ete-
nim Platina, nihil illic *apertè* decretum
esse, tu contrà, nihil omnino decre-
tum esse, nec decerni potuisse: quòd
autem nihil *apertè* decretum sit, indi-
cio est, non nihil decretum esse, quam-

uis non apertè. Cæterùm ad horum verborum sensum quod attinet, ne graueris primam huius responsionis sectionem respicere, vbi liquidò demonstratum est, ea ad expeditionem in terram Sanctam restringenda esse, non ad reliqua huius Concilij decreta dilatanda.

Et quemadmodum hoc in loco particulam eradendo, integrum verborum sensum corrumpis, ita verbis subsequentibus (quæ tu proximè subnectis, perinde ac si à Platina eodem ordine prolata fuissent, ad vberiore eiuſdem rei confirmationem, cùm tamen reuera sensu planè diuersa sint, ac lineis plusquam duodecim interiectis) voculam illam, *ipse*, fraudulenter interseris; quâ velut cardine, contra mentem authoris & veritatem vertitur, & peruertitur sensus: quasi damnatio Almerici, necnon libelli Abbatis Ioachim, solius Pontificis nomine, citra Concilij auctoritatem pronunciata fuisset. Quod eo consilio facis, vt umbratilem quandam videaris occasionem nactus, huius Concilij decreta omnia velut adultera respuendi, inter quæ hæc de Almerico

& Ioachim acta recensentur. Moxque velut alium Platinæ locum, vel ut tuam prioris loci expositionem subiungis; *non eos ait Concilij Lateranensis decreto damnatos, sed ipsius Innocentij Pontificis:* quibus nihil simile in Platina reperies, siue verba spectes, siue verborum sensum. Dicendo etenim Pontificem illos damnassee, non necesse est sequi eos à Concilio non fuisse damnatos, quandoquidem ab utroque fieri poterat; idque vel separatim, vel certè coniunctim; & hoc posteriore modo rem se habuisse, & supra probatum est, & nunc denuò conuincitur, Beluacensis testimonio, qui de hoc Lateranensi Concilio verba faciens, ab eo, dicit, Almericum & Abbatem Ioachim anathematis sententiâ fuisse percussos. Quamobrem tu ille *ipse* es, qui & Platinam iniuriâ affecisti, & Lateranense Concilium putidissimis sophismatibus dehonestati, quique ipsâ rei gestæ euidentiâ male sanæ fidei aperte coargueris.

Beluac lib.
30. hist.
cap. 34.

Hic iam huius sectionis epilogi loco subinfers, *tutò nos concludere posse, tam hæc tum alia, de quibus nihil decerni po-*

tuit in Concilio, à Pontifice suis fuisse Decretalibus inserta; unde cum hos canones corrasisse necesse est, quisquis eos primum in formam modumque Concilij compaginauit. En conclusionem præmissis non absimilem; vtraque verò nihilò minus quàm veritati conformia. Ais quidem tum hæc tum alia, (huius, credo, Concilij decreta velis) à Pontifice suis fuisse Decretalibus inscripta, id est, prout tua te fert sententia, à Pontifice commēta, linque suis Decretalibus primùm descripta: si namque prius à Concilio sancita fuerint, deinde verò in Decretalia redacta, causâ penitus cecidisti: quodque sic se res habuerit, quanquam abundè satis iam probatum sit, vltèrius roboratur ex titulo quo in ipsis Decretalibus prænotantur; videlicet non solum Innocentij nomine, vt alia plurima, sed in hunc modum, *Innocentius tertius in Concilio Generali*. Quæ cum ita sint, hæc tua magnifica assertio, tam corrosis innixa fundamentis, ac sunt hæc Platinæ corruptelæ, sponte sua collabatur necesse est.

Ais denique, cum ex hisce Decretalibus dictos canones desumpsisse, quisquis eos
primus

primus in formam Concilij compaginavit.
 At ego supra tibi demonstraui, eos
 primum ex ipso Concilij Archetypo
 fuisse depromptos. Quòd si modò è de-
 cretalibus collecti fuissent, nihil tibi
 prorsus prodesset, cum vt multoties
 ostensum est, horum author fuerit non
 solus Innocentiùs, vt tu ais, sed ille vnà
 cum Concilio Lateranensi. Adeò vt
 ex tota hac dictorum congeriè, quæ à
 te hætenus inculcata sunt, ne verbum
 quidem quod non aut à veritate, aut à
 re tua alienum sit, inueniri queat: vt-
 que tuis verbis vtar, *de quo nihil decerni
 potest.* Nihilo tamen minùs, (quasi in
 hoc genere parcior fuisses,) dum in
 aliis labes perscrutaris, ipsemet erro-
 rum monstra procudere pergis.

C O S E N V S.

TERTIVS etenim huius Concilij
 canon, (de excommunicatione
 Principum secularium, deque potesta-
 te papali eorum subditos à vinculo fi-
 delitatis absoluendi, eosque regnis &
 principatibus spoliandi) de numero
 Extrauagantium est, cap. 13. de Hære-

reticis, id est, Ipsius Innocentij Decretum, non verò Concilij Lateranensis, *ubi nihil decerni potuit.* Sic canone 71. (qui est de recuperanda de Saracenorum manibus terra sancta, quâ de re Concilium hoc imprimis conuocatum fuit) collector stylo utitur Pontificibus, non Conciliis vsitato. *Ad liberandam* (inquit) *terram sanctam de manibus impiorum, sacro Concilio approbante definimus, &c.* Neque simile quicquam in Concilio definitum fuit; ut cùm Cardinalis Bellarminus) aduersus Apologiam Regis Iacobi) tum Eudæmon Cidonius (in sua parall. Torti & Tortur.) Platinam secuti fatentur. Quisquis igitur ille fuit qui hæc duo decreta, de subditis à vinculo fidelitatis absolvendis, deque recuperanda è Saracenorum manibus terra sancta sanciuir, idem etiam iure censendus est author istius canonis, de Transubstantiatione, qui tot in orbe tragædias excitauit, & ob quem Concilium hoc toties, *Maximum omnium, Generale, & celeberrimum* proclamatur.

RESPONSIO.

TERTIVS, inquis, *huius Concilij canon, de Excommunicatione secularium Principum, de numero extrauagantium est, cap. 13. de Hereticis.* Næ tu hoc asserendo extra orbitam vagaris; nec enim quicquam simile citato loco reperitur, nec ipse quidem locus. Non eo incicias lib. 5. Extrauagantium extra re titulum quendam, *de hereticis*, sed qui tria tantum capitula complectatur, & quorum nullo, qualiscunque huius rei mentio continetur. Quæ de tua fide dicta, sufficiant: nunc verborum sensum ac veritatem perpendere libet. Ais tertium Canonem de numero Extrauagantium esse, hoc est, vnum è decretis ipsius Innocentij Papæ: ex quo colligere licet, vnum & idem tibi videri, de numero Extrauagantium esse, atque ipsius Innocentij Papæ decretum, videlicet, quòd is illorū omniū author fuerit. Quæ in re à veritatis tramite tam immanè aberras, vt ne Extrauagantium quidem vel vnum (vix ex singulis

eorum titulis patet) Innocentij Papæ nomine prænotatur. Perperam igitur à te Innocentio ascribitur hoc decretum, secluso Concilio, cum ipsius sit simul & Concilij, siue potius, ut supra diximus, ipsius in Concilio Lateranensi. Cuius auctoritatem, illius tui toties decantati carminis, *ubi nihil decerni potuit*, solo flatu, ex hominum animis abigere te posse autumabas? tui inquam, nec enim illud penes alium quæmpiam reperitur; cui præter iam dicta, illud etiam oppono Alberti Crantzij, multò probatoris fidei & integritatis viri, qui de Innocentio Papa in hunc modum scribit: *Concilium maximum congregavit Lateranum, ibi multa constituta, quæ hodie extant in corpore iuris.*

Crantz. Metrop. lib. 9.
cap. 1. sect.
Innoc. 3.

Nec hunc certè canonem fideliori manu quàm reliquos tractasti; cuius sensum, variatis terminis, mutilum admodum reddidisti. Præterquam enim quòd nulla illic est mentio regum aut regnorū, Papæ absolutio à vinculo fidelitatis, quo *Domini temporalibus obstringuntur eorū vasalli*, (hæc namq; canonis

ipfissima sunt verba,) nec non terrarum
 quæ sub eorum ditione sunt publica-
 tio, hoc tantum casu vfu veniunt, quo
 nimirum dicti temporales Domini post
 monitionem canonicam, terras suas ob
 hæretica prauitate purgare neglexe-
 rint, inque sua contumacia etiam post
 sententiam excommunicationis iuridi-
 cè ob Episcopis latam, anno vterte
 permanferint; quibus etiam hæc clau-
 fula derogatoria subiungitur, *Saluo iure*
Domini principalis, dummodo super hoc
ipfe nullum præftet obftaculum, nec ali-
quod impedimentum opponat. Iam verò
 hæc summi Pontificis potestas qualis
 qualis fit, ab ea certè perquam longiffi-
 mè diffita est, quam tu mirâ verborum
 confufione, rudium & indoctorum
 illufis auribus, tam formidolosam ex-
 hibes; quasi penes Papam foret, quo-
 rumcunque regum ac principum sub-
 ditos, à vinculo fidelitatis, pro arbitra-
 tu fuo abfoluere, eorumque terras &
 dominia in quoflibet alios, quacun-
 que de caufa, transferre: quo nihil à rei ve-
 ritate remotius. Sed fingamus hanc
 Pontificis Maximi potestatem tam va-

stam esse atque immanem, ac tu siue ipsemet credis, siue aliis nequirer persuadere cupis, quid hoc obsecro tu refert? Num tu pro dignitatis eorum conseruatione sollicitiori moueris affectu, quàm aut ipsi Principes, aut tot fidi eorum ministri, qui hunc canonem simul cum alijs, vel à Concilio placidè receperunt, quod à me supra assertum & demonstratum est, vel illum ab impostore nescio quo sibi obtrudi passi sunt, quod tu quidem asserere ausus es, nondum tamen vel specimen probationis exhibuistis.

Verum enimuerò concilium animi tui non possum non vehementer admirari, qui religionis re-deformata Athleta cùm sis, hunc potissimum canonem, de principum exauetoratione, præ cæteris delegisti, in quem tam petulanter debacohando, reliquis omnibus odium & incredibilitatem conciliari conaris, cùm tamen probè notum sit, haud quaquam mille sexcentorum annorum decursu, tot Principes à Pontificibus Maximis suis fuisse terris spoliatos, quot à perfidiæ tuæ consortibus

centum his tantummodo postremis annis. Sie enim, nescio quo fato, accidisse videmus, ut ubicunque terrarum huius nefandæ hæresis vlcus eruperit, illic continuo populus in suos principes implacabili furore percitus, illos e suis solijs simul & terris aut re verâ deturbauerit, ut in Suecia, Dania, Scotia, inferiori Germania, ciuitate Geneuensi, ac Anglia denique nostra, aut saltem non rarò vi & armis hoc facere tentauerit, ut sunt Francia, Bohemia, Polonia funesti testes. Quid igitur est quod iniquo animo feras summum Pontificem, personam scilicet à regum subditis longè disparem, huiusmodi potestatis prærogatiuâ gaudere, quâ hæreticorum principum petulantiam coercere, ipsosque in Ecclesiæ gremium quoquo modo reducere possit? Maxime, cum ipsi Imperatores, Reges, ac Principes, huic Decretò non modò non refragati sint, sed etiam quantum ad illos spectabat illius auctores fuerint. Tu verò nullo modo animum inducere potes ut credas; hunc canonem à Concilio sancitum esse, tuoque ingenio impensè adeò ad blandiris, ut eius acumine con-

Teste vel
vno locu-
pleissimo
Florimundo Raimundo Burdegalensi Senatore clarissimo,

trarium demonstrasse tibi videris. Audi igitur consilium meum; regibus & principibus grandem hanc imposturam in aurem suggerere; facies sine dubio rem illis gratissimam, quæque illorum infidis subditis non minori erit dedecori, quòd tanti ponderis veritatem tamdiu in iniustitia detinuerint, quàm tibi, quòdeandem è latebris in lucem erueris, immortalis gloriæ summoque emolumento.

Uterius porro obiicis aduersus idem decretum expeditionis pro recuperanda terra sancta, (quod tibi sed præterea nemini, canonem septuagesimum primum vocare lubet,) quia scilicet stylo pontificio, non autem Conciliis vtitur exprimitur. Vnde certè patet, aulicus cui cuiusmodi sis, nō tamen stylum Pontificum ac Conciliorum te ad amissum callere: aliàs etenim minimè dubitasses, hunc morem esse Conciliis quibus interfunt summi Pontifices, ut illorum nomine, hac solummodo additione, *Sacro approbante Concilio*, decreta sanctiantur: ut videre est in Concilio Florentino in literis vnionis, aliisque nonnullis.

Ais insuper, Cardinalem Bellarminum necnoc Eudæmonem Cidonium ex Platina fateri, nullum tale decretum in hoc Concilio conditum esse. Eudæmonem quidē præ manibus non habeo, nec multum refert; cū etenim vtriusque confessio Platinæ autoritate nitatur, eādē responsione vtrique satisfiet. Ad Bellarminum igitur quod spectat, debueras certē minus nobis negotij facessere, quā ad integrum librū viginti fortē plusquam foliorum, ad vix totidem verba nos inuestiganda remittere; quæ tamen cum inuenerimus, in præmium laboris, errorem ac inscitiam tuam etiam inuenerimus. Non enim loquitur Bellarminus de peculiari illo Expeditionis Decreto, an à Concilio latum fuerit necne, sed de negotio terræ sanctę generatim: *de hoc, inquit, Articulo, cum multa disputata fuissent, nihil certi definiri potuit: Vbi aduertendum est, nonnihil interesse discriminis inter has loquendi formulas, nihil certi, quā vtitur Bellarminus, & nihil omnino, vtu ais. Quod quidem nihil certi, probabilissimum est intelligendum esse de vltiori profe-*

cutione belli, à qua intestinis Christianorum dissidiis præpediebantur; non autem de ipso Expeditionis Decreto, quod pauca quædam capitula completitur, tum de elargiendis in hoc opus subsidiis ex Ecclesiæ redditibus, (in quo summopere enituit ipsius summi Pontificis exemplum,) tum etiam decernendis pœnis, in eos qui obstaculum aliquod & impedimentum afferrent; tum denique de indulgentiis imperiendis qui dictum bellum aut susciperent, aut quocunque modo promoverent. Quæ omnia, ut ut certum sit decreta fuisse, verissimè tamen dici poterit, quod refert Bellarminus ex Platina, *cum multa disputata fuissent, nihil certi definiri potuisse*; scilicet quod ad particulares spectat articulos de rebus ad bellum istud necessariis; ad quos descendere, per ingruentes Christianorum discordias, minimè licebat. Quamvis etiam de hoc ipso Decreto non absurdè dici poterit, nihil certi definiri potuisse; habitâ ratione non quidem ipsius literæ aut intentionis, sed effectus siue executionis; quæ nec certa erat, nec omnino verisimilis ob dome-

stica bella ; imò contrarium potius certum erat , nihil scilicet gestum esse. Quod si Platina, & ex ipso Bellarminus, huic Expeditionis Decreto, (quod solum in hoc negotio sancitum contendimus,) omnem omnino fidem auferre voluissent, quorsum hisce restrictionibus vli sunt, *nihil aperte decretum est, nihil certi definitum*, & non potius, quod tu vis, nihil omnino actum esse asseuerarunt ? quod & multò magis genuinum fuisset, ac illorum grauitati consentaneum. His igitur restrictionibus non nihil insinuaturn esse par est intelligere, quod, ni mea leuis sit coniectura, illud ipsum est quod supra memorauì. Quicquid sit, palam est, Decretum hoc à Concilio latum fuisse, vt illis omnibus argumentis constat, quibus totius Concilij (cuius illud pars est) veritatem asseruimus : speciatim verò, (quoniam tu illud hoc in loco speciatim impugnas,) autoritate Mathæi Parisiensis, qui totidem ferè verbis decreti huius meminit, quæ hic referre, quia nimis longum esset, consultò præmitto.

Math. Paris.
hist. ma.
p. 189.

Ais denique, *quisquis ille fuit qui hac*

duo decreta, de exauētorandis principum
 vasallis, deque recuperanda è Saracenorum
 manibus terra sancta sancit, eum illius
 etiam canonis de Transubstantiatione au-
 thorem merito reputandum esse: quod ut-
 cunque verum sit, nihil prorsus tibi
 proderit; ea namque singula condidit
 Innocentius Papa, *Sacro* tamen appro-
 bante Concilio, hoc est, integrum Con-
 cilium, ex Summo Pontifice reliquisq;
 Prælati conflatum, ea decreuit. Nec
 est quod verbum hoc, *Transubstantia-*
tionis, tibi stomachum moueret, aut
 quod illius ergo tibi displiceat Conci-
 lium, cum res nempe significata, ipsius
 Christi Saluatoris ætate minor non sit,
 ut nostri Catholicæ veritatis assertores
 passim comprobant. Quid? quod ipsa
 etiam vox prius usurpata legitur, quàm
 hoc Concilium celebratum est; ut pa-
 tet ex Annalibus Rogeri Houendeni,
 in Henrico secundo, ubi in hunc mo-
 dum loquitur: *Confessi sunt etiam quod*
Sacerdos noster, siue bonus siue malus,
iustus vel iniustus corpus & sanguinem
Christi posset conficere, & per ministerium
huiusmodi sacerdotis, & virtutem verbo-
rum diuinorum quæ à Domino prolata

sunt, panis & vinum in corpus & sanguinem Christi verè transubstantiantur. Similia habet Blesensis, qui eodem Henrico secundo fuit à Sacello, qui sic ait, Epist. 140.
Et ut gratia exempli, in uno Sacramento videas abyssum profundissimam, & humano sensui imperceptibilem, pane & vino transubstantiatis virtute verborum celestium in corpus & sanguinem Christi, &c. Horum Scriptorum vterque floruit tempore Henrici secundi Angliæ Regis, cum tamen hoc Lateranense Concilium habitum sit tempore Ioannis, qui secundus ab Henrico regnavit. Ab his itaque ambobus authoribus anglis, *transubstantiationis* nomen applicatum vidimus, admirabili conuersioni panis & vini in corpus & sanguinem Christi: nec ab alio quopiam auctore ob eius usum malè audiunt, quasi aliquid illius aut præcedentium sæculorum fundatissimæ fidei dissonū protulissent. Non itaque decretum hoc de Transubstantiatione in hoc Concilio Lateranensi postea latum, has (ut ais) in orbe excitauit tragædias, verùm hæreticorum & schismaticorum pertinacia, qui in illud effrenatâ libidine de-

bacchati sunt & obstrepuere. Nec etiam Concilium hoc huius decreti gratiâ, *Maximum omnium, Generale, & celeberrimum* pronuntiatur, sed quòd ab ipso Pontifice Maximo ex vniuersis mundi plagis conuocatum sit; adeò vt post homines natos, nunquam frequentior tum Clericorum tum Laicorum ordinum, eruditione ac nobilitate clarissimorum, visus sit conuentus; in quos huiusmodi scommata coniicere impudentissimæ est audaciæ.

Quare vt huic tandem sectioni finem imponam, operæ pretium erit obseruare, tria hæc decreta in quæ potissimum tanto animi æstu, sed incassum effertuescis, à Gregorio Papa nono primum Decretalibus non multum post inserta fuisse, quàm absolutum esset Concilium: quâ in re (vt antea dixi) viri omnium illius ætatis integerrimi, operâ ac consilio vsuse est. Dein verò in numerum huiusce Concilij Canonum à Crabo relata sunt, qui vti supra etiam probatum est, ea ex ipso Archetypo deprompsit. Denique, reliquis eiusdem canonibus annumerantur, ab iis omnibus, vt Surio, Binio, aliisque qui Conci-

liorum collectiones vnquam in lucem ediderunt. Postremò, totius Ecclesiæ Catholicæ consensu recepta & approbata sunt; quo nullum aliud grauioris momenti testimonium desiderari potest. Quisnam igitur tu es, qui aduersus tam luculentam veritatem mutire audeas? aut cuiusnam priuati par esse posset authoritas? Sine dubio quisquis eò dementiæ dilabatur, meritò hæreticorum *omnium maximus, ac celeberrimus* appellandus est.

Proximo loco nos argumentatione arithmetica adoriris, quam vbi tecum ad calculos redigero, vereor ne in hoc quoque genere, non vsquequaque numeris omnibus absolutus inueniaris. Sic namque supputas.

C O S E N S U S.

VErum enim uerò, quicumque primus Concilium hoc generale siue composuit, siue illud postmodum in lucem edendum curauit, eumque Generalis Concilij titulo insigniuit, haud certè partes suas vsquequaque calluisse videtur. Fieri enim nullatenus potest,

ut inter septimum & octauum generale Concilium, aliud Concilium generale intertrudatur, præcipuè si magnum adeò ac generale fuit, ut asseritur; quod tamen huic Concilio accedere necessum est. Nam secundum Nicenum septimum generale numeratur, quod anno 787. celebratum fuit. Octauum verò locum sibi vendicat, Florentinum anno 1449. habitum; vti clarè liquet ex his verbis sessioni eius vltimæ subinfertis: *Finis octauæ Concilij Generalis factus est 21. Iulij, &c.* Adeò ut nisi duo Concilia Generalia octaua constituerint, hoc nullum esse posse patebit.

RESPONSIO.

A Materia huius Concilij transis ad illius titulum improbandum, & ais, *non vsquequaque partes suas caluisse eum, quisquis illud titulo Generalis Concilij insigniuit: idque ob hanc potissimè rationem. Secundum (inquis) Concilium Nicenum pro vniuersali septimo computant; Concilium verò Florentinum pro octauo: iam verò inter septimum & octauum alterum intrudi posse non credis,*

credis, nedum tam magnū ac Lateranense hoc esse perhibetur. Profectò quisquis hoc Concilium in lucem primus edidit, nisi partes suas melius calluisset, quam qui futilem hanc objectionem efformauit, ignauix suæ pueriles pœnas dare optimè promeritus fuisset. Piget certè pudetque in his quisquilliis discutiēdis diutius immorari. Quinam quæso illi sunt, quos ais, Concilium Florentinum pro octauo Generali computare? Facilè iudicabit quiuis oculatus lector, nos Romano-Catholicos hic intendi, aduersus quos tanto animi feruore disputas, quosque tam stupidos videri velles, vt ad octauum numerum computare nescirent. Sed non Romanam hac in re computationem sequeris, quin illam schismaticorum Græcorum; quanquam nec illi grates vllas tibi rependent, nec communionem tuam minùs quàm nos Catholici auersabūtur. Scias igitur (quandoquidem hoc prius ignorare visuses) octauum œcumenicū Concilium Constantinopoli celebratum esse, idque contra Photium, qui in fausto schismate Græcam à Latina diuulsit Eccle-

siam ; cuius qui sectabantur partes, octauum illud cum aliis nonnullis postea in Occidente habitis, penitus reiciebant ; in quorum numero quartum hoc Lateranense (cui in contrarium tam multum nihil hætenus attulisti) continetur ; quoad Græci rursus cum Latinis in Concilio Florentino conuenientes, illud quidem octauum generale nuncupabant ; quamuis pro innata eorum leuitate illud ipsum mox respuentes, in hunc vsque diem tantummodo septem agnoscunt. Quod si cuilibet integrum sit, Concilia in hunc modum recipere, eadẽque pro arbitrio reicere, quidni tu cum Lutheranis, solummodo sex ; cum Eutichianis qui adhuc in Asia vigent, tria tantum prima ; cum Nestorianis in Oriente, nonnisi duo ; cum Arianis denique ac Trinitariis quorum reliquæ Hungariam adhuc ac Poloniam infestant, nullum omnino recipias : quod æquo & pari iure facies, ac tu tuique gregales Lateranensem hanc Synodum, maximẽque sacrosanctam Oecumenicam Tridentinam improbatis, ac fædo ore obloquimini.

Et ne tibi satis sit errores aliis falsò
exprobrare, nisi in eosdem etiam ipse
verè labaris, circa tempus Concilij
Florentini non parum rursus hallu-
cinaris; sed quia res magni momenti
non est, eam tibi libentiùs condono.
Abesse tamen non potest, quin inge-
nij tui acumen vehementer exosculor,
in hoc quod ais, inter septimum &
octauum Concilium Generale, intru-
di non posse alterum, nedum tam ma-
gnum ac Lateranense illud esse perhi-
betur. Quò nempe innuere videris,
magnitudinem huius Concilij impedi-
mento esse, quò minùs inter septimum
& octauum interuenire potuisset: ita
vt si paulò minùs extitisset, locum in-
ter ea fortassis obtinuisset. Bella certè
réque digna speculatio: fieri itaque
poterat vt paruum aliquod generale
Concilium inter septimũ & octauum
introduceretur, videlicet vt appendix
quædam prioris; aut certè tam arctè ei
cohæreret, vt sub eodem numero com-
prehendi potuisset. At verò hoc de
quo agitur, tam magnum est ac gene-
rale, vt huiusmodi angustiis nullatenus
coarctari possit; ita vt alterum

octauum potius quàm nonum constitui-
tuere debeat: cùm tamen etiamsi nono
loco positum fuisset, alia ratione, vt su-
perius dixi, octauum reputari posset.
Mihi verò hætenus persuasum est, Con-
ciliorum numerum, vtpotè huiusmodi
quantitatis speciei, quam *discretam*,
vocant, non maius exegisse spatium ob
eorum magnitudinem (quod quanti-
tatis continuæ proprium est) quam si
minora fuissent: aded vt inter septi-
mum & octauam, nullo pacto credi-
derim, rerum quantumcunque mini-
marum, non secus ac maximarum, nu-
merum aliquem intercedere potuisse.
Concludendum est itaque huius Con-
cilij magnitudinem non minus inter-
uentui suo inter septimum & octauum,
immutata numeri denominatione ob-
fuisse, quàm si omnium minimum ex-
titisset.

Ais denique, sub finem dicti Conci-
lij Florentini, sessione vltima, expressè
hæc verba haberi, *Finis octauæ Concilij
Generalis, &c.* quæ tamen paulò expref-
sius sic se habent, *Finis Generalis octa-
uæ Synodi*: quæ licet re non multum di-
screpant, vocabulorum tamen *Concilij*

ac Synodi diuersitas nonnulla est , quæ
 si maturius perpendisses, ab obiectione
 hac forsitan abstinuisses. Constat ete-
 nim ex epistola quadam Bartholomæi
 Abrami ad Archiepiscopum Rauennæ,
 à Crabo quidem initio editionis
 suæ, à Binio verò fine insertâ , huius
 Concilij exemplar latinum perditum
 fuisse , illudque quod modò extat, di-
 cti Abrami operâ è græco translatum
 esse: quam ob causam græco potius *Synodi* ,
 quàm latino *Concilij* vocabulo
 utitur. Idcirco autem octaua dicitur,
 quòd in græco exemplari ita inscripta
 fuerat , cuius rei rationem antea de-
 monstraui: quia nempe Græci illastan-
 tummodo Synodos generales reputa-
 bant, quibus illi ipsi interessent, quas-
 que ipsi reciperent , è quarum numero
 Florentina hæc certè octaua fuit. Quæ
 tamen annumeratio à Surio, Binioque,
 necnon orthodoxis omnibus meritò
 reiicitur. Ipse porrò Crabus, quamuis
 hoc in loco errorem hunc silentio præ-
 terire videatur, eum tamen congruen-
 ter ad exemplaria græca , non autem
 de sua sententia locutum esse, vel hinc
 clarè liquet , quòd omnia & singula

præf. huic
 Synod.

Notis in
 Conc. Flo-
 rent.

Concilia inter Nicenum secundum, ac Florentinum habita, Generalia vocat, quæ scilicet ab Ecclesia Catholica talia æstimantur: speciatim. verò de hoc Lateranensi sic præfatur, *Instituta Generalis Concilij Lateranensis tempore Innocentij Papa tertij.*

Tandem sectionem hanc ponderosâ hac illatione claudis: *Adeò ut nisi velint bina octava admittere Concilia Generalia, necesse sit illud Lateranense Generale minimè fuisse: quæ certè ex iisdem præmissis in hunc modum elici poterat; Adeò ut nisi velint non bina modò, sed nouem octava Concilia generalia admittere, necesse sit Constantinopolitanum quartum, Lateranensia quatuor, duo Lugdunensia, alterum quoque Florentinum, aut ex his saltem vnum aliquod Generale minimè fuisse, Horum autem vllum generale non fuisse, falsum quidem consequens est, sed octauum minimè extitisse verissimè asseritur: vnde nec Catholicorum quicumquam Florentinum aut Lateranense octauo loco reponunt, sed hoc quidem duodecimo, illud autem vulgò decimo sexto. Cæterùm ut cum octauo*

numero, qui tibi tantopere placet, tandem in gratiam redeamus, (quandoquidem *vos numeri sumus*) meâ quidem sententiâ, quisquis hanc obiectionem primus elucubrauit, (namque tibi gloriam hanc non temerè præreptam suspicor,) sapientum *oëtauus* optimo iure censebitur: idque sine riuali, non erunt duo, maximè si grandior sit qui ad dignitatis huius consortium aspirat, eo quippè casu nullatenus fieri posse, ut in ordine numeri inter oëtauum & nonum intrudatur, te præceptore acuto didicimus.

C O S E N V S.

PRæterea si vniuersale fuit hoc Concilium, vnde factum est ut illius canones nunquam fuerint vniuersaliter recepti? quemadmodum apud nos in Ecclesia Regnoque Angelicano, nunquam fuisse constat: quod secus proculdubio accidisset, si tunc temporis, Concilium illud, Vniuersalis Concilij famam obtinuisset; aut illius canones, sub eo nomine, per terrarum orbem diuulgati fuissent. At

apud nos in Anglia ab eo ipſo tempore, & contra eius canonem prætentum 46. mos inualuit, vt ſubſidia Regi ſoluerentur *inconfulto Pontifice*. Et aduerſus canonem 41. nobiſcum *currit præſcriptio*, quantumvis multoties *ex bona fide ortum non habeat*. Iterumque Clericorum bona qui de hæreſi conuiſti ſunt, non *in uſum Eccleſiæ*, ſed fiſco Regis conſtantiffimè addicta ſunt, quicquid in oppoſitum faciat prætenti Concilij canon tertius.

RESPONSIO.

VNniuerſalitatẽ porro huius Concilij hinc improbare pergis, quòd illius canones nunquam vniuerſaliter recepti fuerint; vt de regno quidem Angliæ tribus argumentis ostendere conaris: quæ ſicuti nuda ac ſine probatione vlla à te propoſita ſunt, ita nec omnino quicquam probant. Non enim vniuerſalis canonum receptio, Concilij alicuius generalitatẽ efficit, ſed illius ex omnibus chriſtiani orbis partibus indiſtio, qualem fuiſſe huius de quo nunc agitur, ſupra oſtendimus.

Aliàs profectò nullum omnino generale reputari posset, non modò tunc cum indiceretur, aut actu federet, sed ne quidem postquam dissolutum esset, priusquam constaret ab omnibus toto terrarum orbe receptum fuisse: quæ sanè conditio nulli vnquam Concilio accidit, cum nunquam defuerint hæretici (aduersus quorum praua dogmata, omnia fere celebrata sunt Concilia) qui eorum singula, si non ad vnum omnes, ex ijs saltem nonnulli, suscipere recusarent. Adeò vt erudito hoc tuo generalis Concilij charactere, omnia quotquot vnquam extiterunt funditus euertisti. Vt namque verbi gratiâ prima illa quatuor commemoremus, quæ etiam à vobis ore tenus prædicantur, cedo fodes, num eorum canones vniuersaliter recepti sunt? Immodò verò contrà, manifestum est ab ijs omnibus hæreticis fuisse reiectos, ad quorum errores damnandos dicta Concilia celebrata sunt.

Ratio porrò illa quâ probare conaris; Concilij huius Lateranensis canones haudquaquam vniuersaliter fuisse receptos, quia nimirum eos Anglia

nunquam receperit, etiamsi vera foret, consequentia tamen vacillat: frausque tua ac hallucinatio latere deprehenditur in ambiguitate vocis, *Canonum*, quorum quidem alij ad fidem spectant, alij ad mores & ecclesiasticam disciplinam. Vt enim Concilium aliquod vniuersaliter recipi censeatur, necesse non est vt ij singuli qui de reformatione morum sunt, ab omnibus orbis christiani regnis accipiantur; satis est ad Generalis Concilij nomen, promerendum, (quantum ad hoc facit vniuersalis canonum receptio) si qui ad fidem pertinent, vbique gentium recipiantur. Exempli causa, Sacrosancti Concilij Tridentini decreta quæ de regimine Ecclesiastico lata sunt, in regno Galliarum minimè vigent, quod tamen (simul cum omnibus quoquo versum Catholicis regnis) quæ ad fidem spectant æquo animo amplectitur & veneratur, ob eamque causam Concilium illud nihilo minus Generale esse agnoscit. Ex quibus magis magisque detegitur ignorantia tua, qui in his quæ ad Concilia generalia spectant, vsque adeò sciolus es, vt hec nomen quidem,

iuxta Catholicum & orthodoxum illius usum callere videaris. Iam verò nemini dubium esse possit, quin Angliæ regnum, Concilij huius decreta, canonesque quæ ad fidem spectant, sine ulla hæsitazione susceperit, cæteroquin olim velut hæreticum ab Ecclesiæ Catholicæ communionē, vti impræsentiarum præscissum fuisset. Quod autem reliqua Concilij huius decreta, ad Ecclesiæ regimen morumque disciplinam spectantia repudiauerit, non aliunde probas quàm inani verborum flatu, quæ eadem facilitate quâ tu ea effudisti tibi in os regerrere possim; abundè tamen erroris & inscitiae tuæ mihi suppetunt argumenta.

Prænotandus tamen est error tuus (ne dicam mala fides) in referendo *præfento* (sic eum namque tibi vocare lubet) canone 46. contra cuius sensum, inquis, subsidia Regi soluuntur, *inconsulto Pontifice*. Quasi verò canon iste qualiacunque Regi subsidia solui vetaret, absque notitia & consensu Pontificis, cùm manifestum sit, de illis solum intelligendum esse, quæ à Clero ex redditibus Ecclesiasticis persoluenda

forent ; vbi Pontificis Maximi consilium interuenire necesse erat. Quòd autem spectat ad consuetudinem illam tribus hisce canonibus contrariam, quam in Anglia viguisse contendis, etiamsi hoc verum esset (quod equidem non leuiter suspicor, cum à nonnullis Angliæ legis peritis, de illo saltem præscriptionis capite, oppositum prorsus non semel audiuerim) non tamen illico conficitur, hos canones nunquam ibi fuisse receptos. Fieri namque poterat vt hæc consuetudo inoleuerit, vel ex condonatione Summi Pontificis, vel ex usurpatione Regum in præiudicium canonum receptorum, vel denique quod ad præscriptionem attinet, ex effrenata populi peruicacia, qui leges quantumcumque sanctas, si deprauatis suis moribus contrariæ sint, numquam æquo animo ferre potest. Atque vtinam Contrerranei nostri, illos omnes canones in hunc vsque diem inuiolabiliter obseruassent, quos eâ ætate receperunt, quâ maiori certè quàm nunc dierum pietatis doctrinæque ac prudentiæ laude floruerunt; credo equidem dissertationem hanc

quæ mihi tecum intercedit, facili negotio componendam fuisse, aut nunquam potius exorituram.

Iam verò contra nudam hanc assertionem tuam, euidenter ostendo, Concilij huius canones, cùm qui ad fidem spectant, tum qui ad mores, in Anglia fuisse receptos. Primùm testimonio Linvuodi, necnon autoritate Legum municipalium Regni, prout à *Francisco à Sancta Clara* referuntur, in Articulo suo de *Transubstantiatione*. Secundò, autoritate supra laudati Concilij Oxnienſis, ab Archiepiscopo Cantuarienſi septem duntaxat annis post hoc Lateranense conuocati, omniumque ab illo primi, quæ vllibi gentium celebrata noscuntur: vbi sic habetur. *Vt autem omnia sine bono concludantur, Lateranense Concilium sub sancto recordationis Pa-* Bini tom. 7. part. 2. pag. 833:
pa Innocentio celebratum, in præstatione decimarum, & in alijs capitulis precipimus observari. Ex quibus clarè liquet quàm longè à veritatis scopo aberraueris, asserendo Concilij Lateranensis Canones nunquam fuisse in Anglia receptos: sicuti nihilo minùs in sequentibus aberras, dicendo.

C O S E N S U S.

DEnique vix crediderim probatam ullam historiam, ad astruendum huius prætenti Concilij titulum, proferri posse, Patriarchas Hierosolimitanum & Constantinopolitanum, & septuaginta insuper Metropolitanos ei interfuisse: quanquam neque illud sat erit ad Vniuersalis Concilij nomen ac dignitatem huic conciliandum, ob absentiam nimirum relinquorum Patriarcharum Antiocheni & Alexandrini, quos interfuisse non fertur. Ut ut se res habet. *Nihil ibi actum, quod quidem constet*, adeò ut non modò non vniuersale, sed ne Concilium quidem omnino fuit.

R E S P O N S I O.

Quid tu credas non magni refert; scio etenim plures hæreses erroresque à te credi, è quorum numero est quod ais, *nullam proferri posse probatam historiam, quâ astruatur Patriarchas Hierosolimitanum & Constantinopolitanum*

huic Concilio interfuisse, &c. Duplici modo censetur quis alicui Concilio interesse, in propria scilicet persona, vel per legatum; quòd autem duo nominati Patriarchæ priori modo adfuerint, testantur Platina, Paris, & Vrspergensis; reliquos verò duos posteriori modo per legatos adfuisse, cum septuaginta plus Metropolitanis; quin etiam innumeros ferè Archiepiscopos, Episcopos, Abbates ac Priores, quà per se, quà per vicarios suos, simul cum vtriusque Imperatoris, omniumque propemodum Christiani orbis Regum Principumque, necnon celebriorum vrbium Oratoribus, fidem faciunt Paris & Vrspergensis; quos probatos esse historicos haud (credo) inficiaberis; maximè verò Platinam & Parisiensem, quorum operâ iam antea in extrema egestate tua vsus es, ad improbandos (vt tibi videbatur) huius Concilij canones: de quo iisdem ferè verbis loquuntur Paris & Vrspergensis in hunc modum. *Anno ab Incarnatione Domini 1215. celebrata est Sancta Vniuersalis Synodus Roma, in Ecclesia Saluatoris qua Constantiniana vocatur, mense Noem-*

Paris hist.
ma. pag 188.
l c. Vrsperg.
Chronic.
pag. 310.

bris, presidente Domino Innocentio Papa tertio, pontificatus eius anno 18. in quo fuerunt Episcopi 412. inter quos extiterunt de precipuis Patriarchis duo, videlicet Constant: & Hieros: Antiochenus autem graui languore detentus venire non potuit, sed misit pro se Vicarium, Anthedarensem Episcopum: Alexandrinus vero sub Saracenorum dominio constitutus, fecit quod potuit, mittens pro se Diaconum suum Germanum; Primates autem & Metropolitani 71. caterum Abbates & Priores, ultra octingentos; Archiepiscoporum verò & Episcoporum, Abbatum & Priorem, & Capitulorum absentium Procuratorum non fuit certus numerus comprehensus. Legatorum verò Regis Siciliae in Romanorum Imperatorem electi, Imperatoris Constantinopolitani; Regis Francia, Regis Anglia, Regis Vngariae, Regis Hierosolymitani, Regis Cypri, Regis Aragonia, necnon & aliorum Principum, Magnatum ciuitatum, aliorumque locorum ingens fuit multitudo. Hic iam erronea tua fides luculenter satis ampleque redarguitur; ita vt vehementer admiror quibusnam de hoc Concilio historijs versatus fuisti, his quas commemoraui

morauī prætermiſſis ; præſertim verò
 Platinæ ac Pariſienſis, quorum hic qui-
 dem ſummorum Pontificum amiciffi-
 mus fuit, ille verò *ipſi Pontifici Maxi-*
mo ab Epistolis. Quamobrem non te-
 mērè ſuſpisor , te has obſectiuncula-
 rum lacinias ex aliorum ſcriptis corra-
 ſiſſe , à quibus miſerum in modum de-
 ceptus , audaciæ & credulitatis tuæ de-
 bitas pœnas luis. Hoc itaque Conci-
 lium , cui ruruſus intempeſtiuè aded ac
 impudenter inſultas, *pratentumque* ap-
 pellas , velis nolis verè Generale &
 œcumenicum reputabitur, ab optima
 ſemper multoque maxima totius orbis
 parte , Catholicâ Eccleſiâ , dum aliæ
 omnes Eccleſiæ *pratenta*, eorum Con-
 ciliabula canoneſque , cum Pſeudo-
 epiſcopis, Decanis, Capitulis , ſimili-
 buſque nanijs & laruis, qualia ſunt ve-
 ſtræ, nullam apud poſteros memoriam,
 niſi cum ſumma infamia dedecoreque
 coniunctam obtinebunt.

Pergis denique , ac pro more tuo,

mirum rursus in modum decipiatis; cum alioquin prima quatuor Concilia, quibus primus omnium Patriarcha Romanus Pontifex non nisi per Legatos intererat, pro generalibus non sint habenda; quod à communi omnium orthodoxorum, imò & Protestantium Anglorum sensu alienum est: nisi usque adeò ineptire velis, ut vnius quidem absentiam, non tamen duorum, citra vniuersalitatis dispendium ferri posse putabis; maximè si ille vnus Romanus sit Pontifex, cuius absentiam non à Concilijs solis, sed etiam ab orbe terrarum æquissimo animo feres. Veruntamen non mediocrem mihi admirationem affert, te scilicet, quem cæca sanè fortuna, *præsentum* Decanum Burgi Sancti Petri, & *præsentum* Rectorem Collegij Sancti Petri instituit, odio tam implacabili Sancti Petri Cathedram insectari. Quòd si deposito magistrali fastu, tantisper animum applicare velis ad acuratiorem Conciliorum Generalium notitiam acquirendam, & quæ ea sint impedimenta quò minus Concilium aliquod *Generale* dicatur, (quod tamen priùs factum par

esset quàm in censuras tam acerrimas
insurgeres) ne graueris Turrecrematæ
& Cani super hac re opuscula, diligenti
studio percurrere.

Tandem aliquando finem huic tuo
bello libello hunc in modum impo-
nis: *Vt ut se res habet, nihil ibi actum*
quod quidem constet, sicque à Concilio Ge-
nerali tantum aberat, ut ne quidem Con-
cilium omnino fuerit. Primum, assertio
hæc tua planè falsa est, nullâque au-
thoritate suffulta, nisi hominis om-
nium leuissimi, tuâ; quàm tamen ma-
ioris energiæ gratiâ, diuerso characte-
ris genere, velut grauissimi cuiusdam
authoris Apothegma denotasti; cuius
cùm neque nomen nec locum unde de-
sumpta referre digneris, æquum est vt
cerebelli tui propaginem existimem,
eamque propterea vt spuriam rejicio.
Deinde si verum hoc esset, *nihil ibi*
actum esse, quî tamen sequitur, nec Ge-
nerale quidem nec Concilium omni-
no fuisse? De validitate certè necnon

Generale nec Concilium omnino fuisse. Et quàm immeritò, & citra omnem veritatis umbram asserere non vereris, *nihil ibi actum esse*, totâ hac oratione luculentissimè probaui. Solùm addam Mathæi Parisiensis de hoc Concilio testimonium; qui licet huic Pontifici (ut supra memorauimus) infensissimus erat, de hoc tamen Concilio scribens, loco supra citato sic loquitur. *His omnibus congregatis in loco prefato, & iuxta morem Conciliorum Generalium in suis ordinibus singulis collocatis, facto prius ab ipso Papa exhortationis sermone, recitata sunt in pleno Concilio capitula 60. (ubi obiter aduertandum, circa numerum irrepressiblem mendam, legi namque deberet 70.) quæ alijs placabilia, alijs videbantur onerosa. Tandem de negotio Crucifixi & subiectione terre sanctæ verbum predicationis exorsus subiunxit dicens. Ad hæc ne quid in negotio Iesu Christi de contingensibus omittatur, volumus & mundamus, &c.* Sicque Decretum Expeditionis pro recuperanda terra sancta copiosè prosequitur. Ex quibus, quamplurima in hoc Concilio gesta fuisse, apertissimè demonstratur; imò verò ad vnum

omnia quæ ei passim ascribuntur. Denique quod ad nomen spectat, Concilium idque Generale nuncupatur ab Urspergensî, Parisiensi, Platina, Crantzio, Nauclero, Beluacensi, reliquisque omnibus (quos inuenire potui) qui de eo quidquam scriptis mandarunt, te vno irrefragabilis auctoritatis excepto. Quodque summum est, Sanctæ Catholice Ecclesiæ approbatione commendatur, vnica scilicet Christi Sponsæ, veritatis, sapientiæ, sollicitudinis denique ac reuerentiæ dignitate, quaslibet hæreticorum ac schismaticorum sectas immensis parasangis præcellentis: quorum perversa dogmata turpesque contumeliæ, quæ in illam ore sacrilego ventilantur, cui super omnia fidem habere ac venerari deberent, maxime si harum obiectionum instar cum pertinacia fiat, execratione digniora quàm refutatione censenda sunt.

Nihil itaque restat, quàm vt huic responsioni Surij verbis colophonem ad-

rina & Græcia Ecclesia concordia tractatum est; cuique interfuere Patriarcha Constantinopolitanus & Hierosolymitanus, & Archiepiscopi tum Latini tum Græci 70. Episcopi 412. Abbates & Priores plus 800. simul omnes Prælati 1215. aut eo plures. Nec defuere Legati Græci & Romani Imperatoris, Regum Hierusalem, Gallie, Hispania, Anglia, & aliorum. Quod si verò ea cuiquam minus ponderis habere videatur, quod recentior sit, ille certè Christum mendacem facere velle videtur, qui perennem præsentiam suam promisit Ecclesie sue, & Spiritum Sanctum suum spiritum veritatis qui cum illa maneat in æternum. Manet sua semper Catholica Ecclesia auctoritas, quam quisquis contemnere ausus est, non ille efficit ut ea minor sit, sed se dignum reddit, qui eius pondere penitus opprimatur.



FINIS.



